

# कुरिन्थियन क पहिली पत्र

**1** हमार भाई सोस्थिनेस क साथे पौलुस क अउर जेका परमेस्सर आपन इच्छानुसार मसीह ईसू प्रेरित बनावइ बरे चुनेस।

2कुरिन्थुस में रही परमेस्सर क ओन्ह कलीसिया क नाउँ अहइ यानि ओन सबन का नाउँ, जउन मसीह ईसू में रही परमेस्सर क सेवा करइ बरे नेउछावर रहइ, जेका परमेस्सर पवितर मनइयन बनवइ बरे ओकरे साथेन चुनेस। जउन सब जगह पर्भू ईसू मसीह क नाउँ लेत रहत हीं।

3हमरे परमपिता कइँती स अउर हमरे पर्भू ईसू मसीह कइँती स तोहे सबन क अनुग्रह अउर सान्ति मिलइ।

## पौलुस क परमेस्सर क धन्यवाद

4तोहे मसीह ईसू में जउन अनुग्रह कीहीं गइ बा, ओकरे बरे मई तोहरे कइँती स परमेस्सर क हमेसा धन्यवाद करत अहउँ। 5तोहरे पचन क ईसू मसीह में रहइ क कारण हर तरफ स अउर सब बानी अउर सब गियान स परिपूर्ण किहा गवा बा। 6मसीह क बारे में हम जउन साच्छी दिहे अही उ तोहरे बीच में प्रमाणित भई बा। 7अउर एनही क कारण तोहरे लगे ओनके कउनउ इनाम क कमी नाहीं बा। तू हमरे पर्भू ईसू मसीह क परगट होइ बरे इन्तजार करत रहा। 8उ तोहे अन्त तक हमेसा मजबूत बनाए रही जेहसे जब ओहि दिन तोहमों कोई गलती न होइ, जब ईसू फिन स आवइ। हमार पर्भू ईसू मसीह क दिनवा एकदम निहकलंक, खरा बनाए रखीन।

9परमेस्सर एकदम बिसवासी अहइ। ओनही क कारण तोहे हमरे पर्भू अउर ओकरे बेटवा ईसू मसीह क सत संगति बरे बुलावा गवा बा।

## कुरिन्थियन क कलीसिया क समसिया

10भाइयो तथा बहिनियो, हमरे पर्भू ईसू मसीह क नाउँ में मोर तोह सबनस बिनती बा कि तू सभन में कउनउ मतभेद न होइ? तू सभे एक साथेन जुटा रहा, अउर तोहार चिन्तन अउर लच्छ एक्कई होइ। 11भाइयन तथा बहिनियन, मोका खलोए क घराने क लोगन स पता चला ह कि तोहरे पचन क बीच आपस क झगड़ा बा। 12मई इ कहत हउँ कि तोहमें स केऊ कहत ह, “मई पौलुस क हउँ” तउ केउ कहत ह, “मई अपुल्लोस क हउँ।” कीहीउ क मत अहइ, “उ पतरस क अहइ।” त केउ कहत ह, “उ मसीह क अहइ।” 13का मसीह बैटि गवा बाटेन? पौलुस तउ तोहरे बरे क्रूस पर नाहीं चढ़ा रह। का वो चढ़ा रहेन? तोहे पौलुस क नाउँ क बपतिस्मा तउ नाहीं दिहा गवा। बतावा का दीहा गवा? 14परमेस्सर क धन्यवाद बा कि मई तोहमा स

क्रिसपुस अउर ग्युस क छोड़िके कउनो अउर क बपतिस्मा नाहीं दिहा। 15ताकि कउनउ इ न कहि सकइ कि तू लोगन क हमरे नाउँ क बपतिस्मा दिहा गवा बा। 16(मई स्तिफनुस क परिवार कभी बपतिस्मा दिहे रउँ मुला जहाँ तलक बाकी क लोगन क बात बा, तउ मोका याद नाहीं कि मई कउनो ही अउर क कभउँ बपतिस्मा दिहे होउँ।) 17काहेकि मसीह हमका बपतिस्मा देइ क बरे नाहीं, बल्कि बानी क कउनउ तर्क-वितर्क तथा अलंकार क बिना सुसमाचार क प्रचार करइ क बरे पठए रहा ताकि मसीह क क्रूस अइसेन ही व्यर्थ न चला जाइ।

## परमेस्सर क सक्ति अउर गियान-सरूप मसीह

18उ जउन भटकत हयेन, ओनके बरे क्रूस क संदेस एक निरी मूरखतइ अहइ। मुला जउन उद्धार पावत हयेन ओनके बरे उ परमेस्सर क सक्ति बा। 19पवितर सास्तरन में लिखा बा

“गियानियन क गियान क मई नस्ट कइ देबइ, अउर मई सब चतुस क चतुरइ कुंठित करबइ।”

यसायाह 29:14

20कहाँ अहइ गियानी मनई? कहाँ बा विद्वान? अउर एह युगे क सास्त्रार्थी कहाँ अहइ? का परमेस्सर संसारी क बुद्धिमानी क मूर्खता नाहीं सिद्ध किहसे? 21इही बरे काहेकि परमेस्सर गियान क जरिये इ संसार अपने बुद्धि बले स परमेस्सर क नाहीं पहिचान सका तउ हम सँदेस क कही भइ मूर्खता क प्रचार करत अही। 22यहूदियन लोग त अद्भुत चीन्हन क मांग करत हीं अउर गैर यहूदियन विवेक क खोज में अहँ। 23मुला हम तउ बस क्रूस पर चढ़ावा गवा मसीह क ही उपदेस देइत अही। एक अइसेन उपदेस जउन यहूदियन क बरे विरोध क कारण अहइ अउर गैर यहूदियन क बरे निरी मूर्खता। 24मुला ओनके बरे जेनका परमेस्सर द्वारा बोलाई लिहा गवा बा, फिन चाहे ओ यहूदी होई या गैर यहूदी, इ उपदेस मसीह अहइ जउन परमेस्सर क सक्ती अहइ, अउर परमेस्सर क विवेक अहइ।

25काहेकि परमेस्सर क कही गइ “मूर्खता” मनइयन क गियान स कहुँ जियादा विवेकपूर्ण बा। अउर परमेस्सर क कही गइ “कमजोरी” मनइयन क सक्ती स कहुँ जियादा सच्छम बा।

26भाइयो तथा बहिनियो, अब तनिक सोचा कि जब परमेस्सर तउ तू बोलाये रहा तउ तोहमें स बहुत जनेन संसारिक दिस्टी स न तउ बुद्धिमान रहेन अउर न त सक्तिसाली। तोहमें स कइयउ क सामाजिकइ स्तर भी

कउनउ ऊँचा नाहीं रहा। 27बल्कि परमेस्सर तउ संसार में जउन कही गइ मूर्खतापूर्ण रहा, ओका चुनेस ताकि बुद्धिमान लोग लज्जित होईं। परमेस्सर तउ संसार में कमजोरन क चुनेस ताकि जउन मजबूत अहई, उ सबइ लज्जित होईं। 28परमेस्सर संसार में स इन बातन क चुनेस जउन नीचे रहिन अउर जउन तुच्छ रहिन अउर जउन कछू नाहीं रहिन। परमेस्सर एनका चुनेस ताकि संसार जेका कछू समझत ह, ओका उ खराब कइ सकइ।

29ताकि परमेस्सर क सामने कउनउ मनई अभिमान न कइ पावइ। 30मुला तू मसीह ईसू में उही क कारण स्थित हवा, उहइ परमेस्सर क बरदान क रूप में हमार बुद्धि बनिगइ अहइ। उही क जरिये हम निर्दोस ठहरावा गएन अउर हम परमेस्सर क समर्पित होइ सकी अउर हमका पापन स छुटकारा मिलि जाइ।

31जइसेन कि पवित्र सास्तरन में लिखा बा, “अगर कीहीउ क कउनउ घमण्ड करब बाटइ तउन उ पभू में घमण्ड करइ।”\*

### क्रूस पर चढ़ा मसीह क बारे में संदेश

2 भाइयो तथा बहिनियो जब मई तोहरे लगे आए रहेउ तउ परमेस्सर क रहस्यपूर्ण सच क, बानी क चतुरता अउर मानुस बुद्धि क साथे उपदेस देत हुए नाहीं आइ रहेउ 2काहेकि मई इ निश्चय कइ लिहे रहेउ कि तोहारे बीच रहत, मई ईसू मसीह अउर क्रूस पर भइ ओकर मउत क छोड़िके कउनउ अउर बात क जनबइ तलक नाहीं। 3तउन मई दीनता क साथे भय स काँपत भवा तोहरे लगे आएउ ह। 4अउर मोर भासण अउर मोर घोसना मानुस बुद्धि क लुभावइवाले सब्दन स मिला नाहीं रहा, बल्कि ओहमें रहा आतिमा क सक्ति क प्रमान 5ताकि तोहरे बिसवास मानुस बुद्धि क बजाय परमेस्सर क सक्ति पइ टिक सकइ।

### परमेस्सर क गियान

6जे समझदार अहई, ओनके हम बुद्धि देत अही, काहेकि इ बुद्धि, इ जुग क बुद्धि नाहीं बा, न ही ऐह जुगो क ओन्हन सासकन क बुद्धि अहइ जेका बिनास क कगार पर लइ आवा जात बा। 7एकरे स्थान पर हम तउ परमेस्सर क ओह रहस्यपूर्ण विवेक क देत हीं जउन छुपा हुआ रहा अउर अनादि काल स परमेस्सर हमार महिमा बरे निश्चित किहे रहा। 8अउर जेका ऐह जुगो क कउनउ सासक नाहीं समझेन काहेकि अगर उ सबइ ओका समझ पाए होतेन तउ उ पचे ओह महिमावान पभू क क्रूस पर न चढ़उतेन। 9मुला पवित्र सास्तरन में लिखा बा:

“जेहे नाहीं अंखिया देखेन अउर नाहीं काने स सुनेन तक, जहाँ मानुस क बुद्धि तक कभऊँ नाहीं पहुँचत ऐसी बानी ओनके बरे बनावाइस पभू जे ओनकर पिरेमी जन होइ जातेन।”

यसायाह 64:4

10मुला परमेस्सर इन बातन क आतिमा क जरिये हमरे बरे परगट किहे अहइ। काहेकि आतिमा हर कीहीउ बात क दूँद निकालत इहाँ तक कि परमेस्सर क छिपी गहरायन तक क। 11अइसेन के अहइ जउन दूसरे मनइयन क मन क बात जानि लेइ सिवाय ओह मनई के ओह आतिमा क जउन ओनके अपने भितरइ अहइ। एह तरह परमेस्सर क बिचारन केऊँ परमेस्सर क आतिमा क छोड़िके अउर कउन जान सकत ह। 12मुला हम संसारिक आतिमा नाहीं बल्कि ऊ आतिमा पाए अही जउन परमेस्सर स मिलत ह ताकि हम उन बातन क जान सकी जेनका परमेस्सर हमका मुक्त रूप स दिहे बाटइ। 13ओनही बातन क हम मनइयन बुद्धि क जरिये बिचारा गवा सब्दन में नाहीं बोलित बल्कि आतिमा द्वारा बिचारा गवा सब्दन स आतिमा क चीजन क बियाखिया करत बोलत अही। 14एक प्राकृतिक मनई परमेस्सर क आतिमा द्वारा प्रकासित सच क ग्रहण नाहीं करत काहेकि ओकरे बरे उ बात खरी मूरखता होत ह, उ ओन्हे समझि नाहीं पावत काहेकि उ आतिमा क आधार पर ही परखी जाइ सकतहीं। 15आत्मिक मनई सब बातन क निआव कइ सकत ह, ‘मुला ओकर निआव केऊ नाहीं कइ सकत। काहेकि पवित्र सास्तरन कहत हीं:

16“पभू क मन का कउन जान सकत हय? ओका कउन सलाह दइ सकत ह?”

यसायाह 40:13

मुला हमरे लगे ईसू क मन बा।

### मनइयन क अनुसरण उचित नाहीं

3 मुला भाइयो तथा बहिनियो, मई तू लोगन स वइसेन ही बात नाहीं कइ सकेउँ जइसे आत्मिक लोगन स करत हउँ। मोका एकरे विपरीत तोहे लोगन स वइसेन बात करइ पड़ी जइसे संसारिक लोगन स कइ जात ह। यानि ओनसे जउन अबहीं मसीह में बच्चा अहईं। 2मई तोहे पियइ क दूध दिहेउँ, ठोस आहार नाहीं, काहेकि तू अबहीं ओका खाइ नाहीं सकत रहेया अउर न तउ तू एका आजउ खाइ सकत अहा 3काहेकि तू अबहीं तलक संसारी अहा। का तू संसारी नाहीं अहा? जबकि तोहमें आपसी इरसा अउर कलह मउजूद बा। अउर तू संसारिक मनइयन जइसा व्यवहार करत अहा। 4जब तोहमें स केऊ कहत ह, “मई पौलूस स हउँ” अउर दुसर कहत ह, “मई अपुल्लोस क हउँ” तउ का तू संसारिक मनइयन क स आचरण नाहीं करत्या?

5अच्छा त बतावा अपुल्लोस का अहइ अउर पौलूस का अहइ? हम तउ केवल उ सेवक अही जेकरे द्वारा तू बिसवास किहे अहा। हमरे में स हर एक बस उ काम किहेस जउन पभू हमका सौंपे रहा। 6मई बीज बोएउँ, अपुल्लोस तउ ओका सीचेस, मुला ओकर बढ़वार तउ परमेस्सर किहस। 7इहइ प्रकार न तउ उ जे बोएस, बढ़ा बा, अउर नाहीं उ जउन ओका सीचेस, मुला बढ़ा तउ परमेस्सर अहइ जउन एनका बढ़ा किहेस। 8उ जे बोवत ह अउर उ जउन सींचत ह, दुन्नऊँ क प्रयोजन समान बा। तउन हर एक अपने कामन क परिश्रम क अनुसारइ फल पइहीं। 9परमेस्सर

क सेवा में हम सब सहकर्मी अही। तू परमेस्सर क खेत अहा। अउर तू परमेस्सर क मंदिर अहा।

10परमेस्सर क ओह अनुग्रह क अनुसार जउन मोका दिहा गवा रहा, मई एक कुसल प्रमुख सिल्पी क रूप में नीव डालेउँ मुला ओह पइ निर्माण तउ केऊ अउरइ करत ह, मुल हर एक क सावधानी क साथे धियान रखइ चाही कि उ ओह पर निर्माण कइसे करत बा। 11काहेकि जउन नीव डाली गइ बा उ खुद ईसू मसीह ही अहइ अउर ओसे अलग दूसर नीव केऊ बनाइ नाही सकत।

12अगर लोग ओह नीव पर निर्माण करत ही, फिन चाहे उ पचे ओहमे सोना लगावई, चांदी लगावई बहुमूल्य रतन लगावई, लकड़ी लगावइ, फूस लगावई या तिनका क प्रयोग करई, 13हर मनई क काम स्पष्ट रूप स देखोई देइ। काहेकि उ दिन ओका उजागर कइ देइ। काहेकि उ दिन जुवाला क साथे परगट होइ अउर उहइ जुवाला हर मनई क कामन क परखी कि उ सबइ काम कइसेन बाटेन। 14अगर ओह नीव पर कउनउ मनई क करमन क रचना टिकाऊ होइ

15तउ उ ओकर प्रतिफल पाइ अउर अगर कीहीउँ क काम ओह जुवाला में भसम होइ जाइ तउ ओका हानि उठावइ क होइ। मुला फिन भी उ खुद वइसेनही बचि निकरी जइसे कउनउ आगी स बरत भए भकान स पराइके बचत ह।

16का तू नाही जानत अहा कि तू पचे खुद परमेस्सर क मंदिर अहा अउर परमेस्सर क आत्मा तोहमें निवास करत ह? 17अगर केऊ परमेस्सर क मंदिर क हानि पहुँचावत ह तउ परमेस्सर ओका नस्त कइ देउ। काहेकि परमेस्सर क मंदिर तउ पवितर बा। हौं, तू ही तउ उ मंदिर अहा।

18अपने आपके जिन छला, अगर तोहमें स केउ इ सोचत ह कि इह जुगे क मानदंड क अनुसार उहइ बुद्धिमान बा तउ ओका बस वइसेन ही मूर्ख बना रहइ चाही ताकि उ सही में बुद्धिमान बनि जाइ, 19काहेकि परमेस्सर क डिस्टी में संसारिक चतुराई मूरखता अहइ। पवितर सास्तर कहत ह, “उहइ (परमेस्सर!) फँसाइ देत ह बुद्धिमानन क ओनकेन ही चतुराई में।” 20अउर फिन, “जानत ह पभू बुद्धिमानन क बिचार सब केउ काम क न अहई। 21इही बरे मनइयन पर कीहीउ क गरब न करइ चाही काहेकि इ सब कछू तोहार तउ अहई। 22फिन चाहे उ पौलस होइ, अपुल्लोस होइ या पतरस चाहे संसार होइ, जीवन होइ, या मउत होइ, चाहे इ आज क बात होइ या आवइवाले भियान क। सब कछू तोहरइ ही अहइ। 23अउर तू मसीह क अहा अउर मसीह परमेस्सर क।

### मसीह क संसेस वाहक

4 हमरे बारे में कीहीउ मनई कएँ तरह सोचइ चाही कि हम लोग मसीह क सेवक अही। परमेस्सर तउ हमका अउर रहस्यमय सत्य सौपे अहइ। 2अउर फिन जेका इ रहस्य सौपे अहइ, ओन पर इ दायित्व भी बा कि उ पचे बिसवास क जोगग होई। ओका एँकर तनिकउ चिंता नाही बा कि तू लोग मोर निआव करा या मनइयन क कउनउ अउर

अदालत। ना मई खुद आपन निआव करत हउँ। 4काहेकि मोर मन साफ बा। मुला इहइ कारण मई छूट नाही जाइत। पभू उ अहइ जउन निआव करत ह। 5इही बरे ठीक समइ आवइ स पहिले मतलब जब तलक पभू न आइ जाइ, तब तलक कीहीउ बात क निआव जिन करा। उहइ अंधियारे में छिपी बातन क उजागर करी अउर उ मने क प्रेरणा क परगट करी। ओह समइ परमेस्सर कइँती स हर कीहीउ क उपयुक्त प्रसंसा होइ।

6भाइयो तथा बहिनियो, मई इन बातन क अपुल्लोस पर अउर खुद अपने पर तू लोगन क बरे ही चरितार्थ किये अहउँ ताकि तू पचे हमार उदाहरण देखत भए इन बातन क परे जिनजा जउन सास्तरन में लीख बा। ताकि एक मनई क पच्छ लेत अउर दुसरे क विरोध करत भए अहंकार में न भरि जा। 7कउन कहत ह कि तू कीहीउ दूसरे स जियादा अच्छा अहा। तोहरे लगे आपन अइसेन का बा? जउन तोहे दिहा नाही गवा बा? अउर जब तोहे सब कछू कीहीउ क जरिये दीन्ह गवा बा तउ फिन एँह रूप में अभिमान कउने बात क कि जइसेन तू कउने स कछू पाए ही न अहा।

8तू लोग सोचत अहा कि जेह कउनउ चीज क तोहे जरूरत रही, अब उ सब कछू तोहरे लगे बा। तू सोचत ह अब तू सम्पन्न होइ गवा। तू हमरे बिना ही राजा बनि बइठ्या। केतना अच्छा होत कि तू सही में राजा होत्या ताकि तोहरे साथे हमहूँ राज्य करित। 9काहेकि मोर बिचार बा कि परमेस्सर हम प्रेरितन क करम-छेत्र में उन लोगन क समान सबसे अन्त में स्थान दिहे अहइ जेनका मउत क सजा दीन्ह जाइ चुकी बा। काहेकि हम पूरा संसार, सरगदूतन अउर लोगन क सामने तमासा बना अही। 10हम मसीह क बरे मूरख बना अही मुला तू लोग मसीह में बहुत बुद्धिमान अहा। हम कमजोर अही मुला तू तउ बहोत सबल अहा। तू सम्मानित अहा अउर हम अपमानित। 11एँह घड़ी तक हम भूखा पियासा अही। फटा-पुरान चिथड़ा पहिने अही। हमका मारा गवा। हम बेघरे क अही। 12आपन हाथन स काम कइके हम मेहनत-मजदूरी करित ह। 13गाली खाइके भी हम आसीर्बाद देइत ह। सतावा जाइ प हम ओका सहित ह। जब हमार बदनामी होइ जात ह, हम तब भी मीठा बोलित ह। हम अबहूँ जइसेन एह दुनिया क मल-फेन अउर कूड़ा कचरा बना भआ अही।

14तोहे सबन क लज्जित करइ क बरे मई इ नाही लिखत हउँ। बल्कि आपन पिआरे बच्चन क रूप में तोहे सबन क चेतावनी देत हउँ। 15काहेकि चाहे तोहरे लगे मसीह में तोहरे दसउ हजार सिच्छक मौजूद अहई, मुला तोहार पिता तउ अनेक नाही अहइ। काहेकि सुसमाचार द्वारा मसीह ईसू में मई तोहार पिता बना हउँ 16इही बरे तोहसे मोर आग्रह बा, मोर अनुकरण करा। 17मई इही बरे तीमुथियुस क तोहरे लगे भेजे रहेउँ। उ पभू में स्थित मोर पिआरा अउर बिसबास करइ जोगग बेटवा अहइ। मसीह ईसू में मोर आचरण क उ तोहे सबन क याद देवाइ। जेका मई हर कहूँ, हर कलीसियन में उपदेस दिहे हउँ।

18कछू लोगन अंधकारे में एँह तहर फूल उठा अहई इ सोच कर कि मई न आउब। 19अगर परमेस्सर चाहेस तउ

जल्दी ही मई तोहरे लगे अउबइ अउर फिन अंहकार मँ फूला ओन लोगन क मात्र वाचालता क नाही बल्कि ओनकर सक्ति क देख लेबइ। 20काहेकि परमेस्सर क राज्य वाचालता पर नाही, सक्ती पर टिका बा।

21तू पचे का चाहत अहा:

हाथ मँ पिरैम अउर छड़ी थामे आउब मई तोहरे लगे, कोमल आतिमा साथे मँ लइ आउब?

### कलीसिया मँ दुराचार

5 सहीयउ मँ अइसेन बतावा गवा बा कि तू लोगन मँ दुराचार फइला भआ बा। अइसेन दुराचार-व्यभिचार तउ अधर्मियन तक मँ नाही मिलत। जइसेन केऊँ तउ आपन बिमाता तक क साथ सहवास करत ह। 2अउर फिन तू लोग अभिमान मँ फूला भआ अहा। मुला का तोहे एकरे बरे दुखी न होइ चाही? जे केऊ दुराचार करत ह ओका तउ तू पचे अपने बीच स निकाल बाहरे करइ चाही। 3मई जद्यपि सारीरिक रूप स तोहरे बीच नाही अही मुला आत्मिक रूप स तउ हुवैइ हाजिर अही। अउर माना ऊहा हाजिर रहत भआ जे अइसेन खराब काम किहे अहई, ओकरे विरुद्ध मई आपन इ निर्णय दइ चुका अही 4कि जब तू हमरे साथे हमार पभू ईसू क नाउँ मँ हमार आतिमा अउर हमार पभू ईसू क सक्ति क साथे इकट्टा होब्या। 5तउ अइसेन मनई क ओकर भौतिल मानुस सुभाउ क खराब कइ डालइ बरे सइतान क सौँप दीन्हा जाई ताकि पभू क दिना ओनके आतिमा क बचावा जाइ सकइ।

6तोहार इ बड़बोलापन अच्छा नाही बा। तू एह कहावत क त जानतही अहा, “तनिक खमीर आटा क पूरा लउँदा क खमीरमय कइ देत ह।” 7पुराने खमीर स छुटकारा पावा ताकि तू आटा क नया लौदा बनि सका। तू तउ बिना खमीरवाली फसह क रोटी क समान हवा। हमका पवित्तर करइके बरे मसीह को फसह क मेमने क रूप मँ बलि चढ़ाइ दीन्हा गवा। 8इही बरे आवा हम आपन फसह क ल्यौहार बुराइ अउर दुस्तइ स युक्त पुरा खमीर क रोटी स नाही बल्कि निस्था अउर सत्य स युक्त बिन खमीर क रोटी स मनाई।

9अपने पिछले चिट्ठी मँ मई लिखे रहेउँ कि तोहे ओन लोगन स आपन नाता नाही रखइ चाही जउन व्यभिचारी अहई। 10मोर इ प्रयोजन बिल्कूल नाही रहा कि तू एँह दुनिया क व्यभिचारियन, लोभी लोगन, ठगन या मूर्ति पूजकन स कउनउ सम्बन्ध ही जिन रखा। अइसेन होइ पइ तउ तोहे सबन क इ संसार स ही निकरि जाइ क होइ।

11मुला मई तोहे सबन क जउन लिखेउ ह उ इ अहइ कि कउनउ अइसेन मनई स नाता न रखा जउन अपने आपक मसीही बन्धु कहवाइ क भी व्यभिचारी, लोभी; मूर्ति पूजकन, चुगलखोर, पियककइ या एक ठग अहई। अइसेन मनई क साथे त भोजन भी ग्रहण जिन करा।

12जउन लोग बाहरे क बाटेन, कलीसिया क नाही, ओनकर निआव करइके-भला मोर का काम। का तोहे ओन्हीन क निआव न करइ चाही जउन कलीसिया क भितर क अहई? 13कलीसिया क बाहरेवालन क निआव तउ

परमेस्सर ही करी। पवित्तर सास्तर कहत ह, “अपने बीच से, तू पापी क निकार बाहर करा।” \*

### आपसइ क विवादन क निपटारा

6 का तोहरे मँ स केउ अइसेन बा जउन अपने साथी क साथे केउ झगड़ा होइ पे परमेस्सर क पवित्तर मनइयन क लगे न जाइके अधर्मी लोगन क अदालत मँ जाइके साहस करत होइ? 2या का तू पचे इ नाही जानत अहा कि परमेस्सर क पवित्तर मनई ही सारे संसार क निआव करिही? अउर जब तोहरे जरिये समूचइ संसार क निआव किन्हा जाइ क बाटइ तउ का इन छोट-छोट बातन क निआव करइ जोगग तू नाही अहा? 3का तू नाही जानत अहा कि हम सरगदूनन क भी निआव करबइ? फिन इ जीवन क इन रोजमर्रा क छोट-मोट बातन क त कहबइ ही का। 4अगर हर दिन तोहरे बीच कउनउ न कउनउ विवाद रहतइ ही रहत ह तउ का न्यायाधीस क रूप मँ तू पचे अइसेन मनइयन क नियुक्ति करब्या जेनकर कलीसिया मँ कउनउ स्थान नाही बा। 5इ मई तोहसे एँह बरे कहत हउँ कि तोहे सबन क कछू लाज आवइ। का स्थिति एँही बिगड़ि चुकि बा कि तोहरे बीच केऊँ अइसेन बुद्धिमान मनइ अहइ नाही जउन अपने मसीही भाइयन क आपसी झगड़ा सुलझाइ सकइ? 6का एक भाई कबहूँ अपने दुसरे भाई स मुकदमा लड़त रहा! अउर तू तउ अबिसवासियन क सामने अइसा करत रहे रह्या।

7असलियत मँ तोहार पराजय तउ इही मँ होइ चुकी कि तोहरे बीच आपस मँ एक दूसरे क खिलाफ कानूनी मुकदमा अहई। एकरे स्थान पर तू आपस मँ अनिआव ही काहे नाही सही लेत्या? अपने आप क काहे नाही लुटि जाइ देत्या। 8अरे अनिआव तू तउ खुदइ करत अहा अउर अपने ही मसीही भाइयन क लूटत अहा।

9अउर का तू नाही जानत अहा कि खराब लोग परमेस्सर क राज्य क उत्तराधिकार न पइहीं? अपने आप को धोखा न द्या। व्यभिचार करइवाला, मूर्तिपूजक, व्यभिचार, गुदा-भंजन करइवाला, लौडेबाज, 10छुटेरे, लालची, पियककइ चुगलखोर अउर ठग परमेस्सर क राज्य क उत्तराधिकारीन होइहीं। 11तोहमें स कछू अइसेन ही रहेन। मुला अब तोहे सबन क धोइ-मांजिके पवित्तर कइ दिहे हउँ। तोहे परमेस्सर क सेवाँ मँ अरपित कइ दीन्हा वा बा। पभू ईसू मसीह क नाउँ अउर हमरे परमेस्सर क आतिमा क द्वारा ओन्हे धर्मी करार दीन्हा जाइ चुका बा।

### अपने सरीरी क परमेस्सर क महिमा मँ लगावा

12“मई कछू भी करइ क स्वतन्त्र हउँ” मुला हर कउनउ बात हितकर नाही होत। हाँ, “मई सब कछू करइ क स्वतन्त्र हउँ” मुला मई अपने पर कीहीउ क हावी न होइ देब। 13कहा जात ह, “भोजन पेट क बरे बा, अउर पेट भोजन क बरे।” मुला परमेस्सर इन दुन्नउ क ही समाप्त कइ देई। अउर हमरे सारीरिक तउ भी व्यभिचार क बरे नाही बा

बल्कि पभू क सेवा क बरे बा। अउर पभू हमार देह क कल्लियान क बरे बा। 14परमेस्सर न केवल पभू क ही पुनर्जीवित नाहीं किहेस बल्कि आपन सक्ति स उ मउत स हम सबे कभी जियाइ उठाई। 15का तू नाहीं जानत अहा कि तोहरे सरीर खुद ईसू मसीह का हिस्सा अहइ? तउ का मोका ओन्हे, जउन मसीह क अंग हयेन, कउनउ वेस्या क अंग बनाइ देइ चाही? 16निस्चय ही नाहीं। अउर का तू इ नाहीं जानत अहा, कि जउन अपने आपके वेस्या स जोड़त ह, उ ओकरे साथे एक देह होइ जात ह। पवितर सास्तरन में कहा गवा बा: “काहेकि उ दुन्नऊ एक होइ जइ ही,”\* 17मुला उ जउन आपन लौ पभू स लगावत ह, उ आतिमा में एकाकर होइ जात ह।

18व्यभिचार स दूर रहा। दुसरे सभन पाप जेका एक मनई करत ह, ओकरे सरीर स बाहरे होत हीं मुला अइसेन मनई जउन व्यभिचार करत ह उ तउ अपने सरीर क विरुद्ध पाप करत ह। 19अउर का तू नाहीं जानत अहा कि तोहार सरीर ओह पवितर आतिमा क मंदिर अहइ जेका तू परमेस्सर स पाए अहा अउर जेका तू आपन बनाइ क न रख सक्या। अउर उ आतिमा तोहार आपन नाहीं बा।

20काहेकि परमेस्सर तोहे सबन क कीमत चुकाइ क खरीदे अहइ इही बरे अपने सरीर क द्वारा परमेस्सर क इज्जत कर।

### बियाह

7 अब इन बातन क बारे में जउन तू लिखे रह्या: अच्छा इ बा कि कउनउ मनई कीहीउ स्त्री स बियाह न करइ। 2मुला यौन अनैतिकता क घटना क सम्भावनावन क कारण हर पुरुस क आपन पत्नी होइ चाही अउर हर स्त्री क आपन पति। 3पति क चाही कि पत्नी क रूप में जउन कछू पत्नी क अधिकार बनत ह, ओका देइ। अउर इही तरह पत्नी क भी चाही कि पति क ओकर यथोचित प्रदान करइ। 4अपने सरीर पर पत्नी क कउनउ अधिकार नाहीं बा, बल्कि ओकरे पति क बा। अउर इही तरह पति क ओकरे अपने सरीर पर कउनउ अधिकार नाहीं बा, बल्कि ओकरे पत्नी क अहइ। 5अपने आप क पराथना में समर्पित करइ क बरे थोड़े समइ तक एक दूसरे स समागम न करइ क आपसी सहमति क छोड़िके, एक दूसरे क संभोग स वंचित जिन करा। फिन आतिमा संयम क अभाउ क कारण कहुँ सइतान तोहे कउनउ परीच्छा में न डालि देइ, इही बरे तू फिन समागम कइ ल्या। 6मई इ एक छूट क रूप में कहत रहत हउँ, आदेस क रूपें में नाहीं।

7मई तउ चाहित हउँ सभन लोग मोरे जइसेन होतेन। मुला हर मनई क परमेस्सर स एक विशेष बरदान मिला बा। कीहीउ क जिअइ क एक ढंग बात त दुसरे क दूसर।

8अब मोका अविवाहितन अउर विधवा क बारे में इ कहब बा: अगर उ हमरे समान अकेल ही रहई तउ ओकरे बरे इ अच्छा रही। 9मुला अगर उ पचे अपने आप पर काबू न रख सकई तउ ओन्हे बियाह कइ लेइ चाही,

काहेकि वासना क आग में जलत रहइ स विआह कइ लेब अच्छा बा।

10अब जउन विवाहित अहउँ ओनका हमार ई आदेस बा, यद्यपि इ हमार नाहीं बा बल्कि पभू क आदेस बा कि कउनउ पत्नी आपन पति क न तियागइ चाही। 11मुला अगर उ ओका छोड़िही देइ तउ ओका फिन अनव्याहा ही रहइ चाही या अपने पति स मेल-मिलाप कइ लेइ चाही। अउर अइसेन ही पती क अपनी पत्नी क छोड़इ न चाही।

12अब सेस लोगन स मोर इ कहब बा: (ई मई कहत हउँ न कि पभू) अगर कि कउनो मसीही भाई क कउनउ अइसी पत्नी बा जउन एँह मते में बिसवास नाहीं रखत अउर ओकरे साथे रहइ क सहमत बा त ओका तियाग देइ चाही। 13अइसेन ही अगर कउनो स्त्री क कउनउ अइसेन पति बा जउन पथ क बिसवासी नाहीं अहइ मुला ओकरे साथे रहइ क सहमत बा त ओह स्त्री क भी आपन पति तियागइ न चाही। 14काहेकि उ अबिसवासी पति बिसवासी पत्नी क लगे क सम्बन्ध क कारण पवितर होइ जात ह अउर इही तरह उ अबिसवासी पत्नी अपने बिसवासी पति क हमेसा साथ रहे स पवितर होइ जात ह। नाहीं तउ तोहार सन्तान अस्वच्छ होइ जात मुला अब तउ उ पचे पवितर बाटेन।

15फिन भी अगर केउ अबिसवासी अलग होइ चाहत ह तउ उ अलग होइ सकत ह। अइसन स्थितियन में कउनो मसीह भाई या बहिन पर कउनउ बंधन लागू न होई। परमेस्सर हमका सान्ति क साथे रहइ क बोलाए अहइ। 16हे पत्नियो, का तू पचे जानत अहा!? होई सकत ह तू अपने अबिसवासी पति क बचाइ ल्या। हे पति, का तू जानत ह? होइ सकत ह तू अपने अबिसवासी पत्नी क बचाइ ल्या।

### जइसन अहा, वइसेइ जिआ

17पभू जेका जइसेन दिहे अहइ अउर जेका जेह रूप में चुनें अहइ, ओका वइसेन ही जियइ चाही। सभन कलीसियन में मई इही क आदेस देत हउँ। 18जब किहू क परमेस्सर क द्वार बोलावा गवा, तब अगर उ खतना युक्त रहा तब ओका आपन खतना छिपावइ न चाही। अउर किहू क अइसेन दसा में बोलावा गवा जब उ बिना खतना क रहा तउ ओकर खतना करावइ न चाही। 19खतना तउ कछू नाहीं बाटइ अउर न ही खतना न होब कछू बा। बल्कि परमेस्सर क आदेसन क पालन करब ही सब कछू अहइ। 20हरि किहू क उही स्थिति में रहइ चाही, जेहमें ओक बोलावा गवा बा। 21का तोहे सबन क दास क रूप में बोलावा गवा बा? तू एकर चिन्ता जिन करा। मुला अगर तू स्वतंत्र होई सकत ह तउ आगे बढ़ अउर अवसर क लाभ उठावा। 22काहेकि जेका पभू क दास क रूप में बोलावा गवा, उ तउ पभू क स्वतंत्र मनई अहइ। इही तरह जेका स्वतंत्र मनई क रूप में बोलावा गवा, उ मसीह क दास अहइ। 23परमेस्सर कीमत चुकाइके तोहे सबन क खरीदे बाटइ। इही बरे मनइयन क दास न बना। 24भाइयो, तोहे जउने स्थिति में बोलावा गवा बा, परमेस्सर की सामने उही स्थिति में रहा।

**बियाह करइ सम्बन्धी प्रश्नन क उत्तर**

25 अविवाहितन क सम्बन्ध में पभू कइँती स मोका कउनो आदेस नाहीं मिला बा। इही बरे मई पभू क दया पाइके बिसवासी होइ क कारण आपन राय देत हउँ। 26 मई सोचत हउँ कि एह वर्तमान संकट क कारण इहइ अच्छा बा कि कउनउ मनई मोरे समान ही अकेला रहइ। 27 अगर तू विवाहित अहा तउ ओसे छुटकारा पावइ क यत्न जिन करा। अगर तू पत्नी स मुक्त अहा तउ ओका खोजा न। 28 मुला अगर तोहार जीवन विवाहित बा तउ तू कउनउ पाप नाहीं किहे अहा। अउर अगर कउनउ कन्या बियाह करत ह, तउ कउनउ पाप नाहीं करत ह मुला अइसेन लोग सरीरीक कस्ट उठइहीं जेनसे मई तोहे सबन क बचावइ चाहत हउँ।

29 भाइयो तथा बहिनियो, मई तउ इहइ कहत हउँ, समइ बहुत कम बा। इही बरे अब आगे, जेनके लगे पत्नियन अहई उ पचे अइसन ही रहई, माना उनके पास पत्नियन हइयइ नाहीं हइन। 30 अउर उ सबइ जउन विलखत अहई उ पचे, अइसेन रहई, माना कबहूँ दुखही न भवा होइ। अउर जउन आनन्दित हयेन, उ पचे अइसेन रहई, माना खुसइ नाहीं भवा रहेन। अउर उ पचे जउन चीज मोल लेत हीं, अइसेन रहइ माना ओनके लगे कछुउ न होइ। 31 अउर जउन संसारिक सुख-बिलासन क भोग करत हयेन, उ पचे अइसेन रहई, माना उ पचे चीज ओनके बरे कउनउ महत्व नाहीं रखत। काहेकि इ संसार अपने वर्तमान सरूप में नासवान बा। 32 मई चाहत हउँ आप लोग सबइ चिन्ता स मुक्त रहा। एक अविवाहित मनई पभू सम्बन्धी विसयन क चिन्तन में लगा रहत ह कि उ पभू क कइसे खुस करइ। 33 मुला एक विवाहित मनई संसारिक विसयन में ही लिप्त रहत ह कि उ आपन पत्नी क कइसे खुस कइ सकत ह। 34 एह तरह ओकर व्यक्तित्व बँटि जात ह। अउर अइसेन कउनउ अविवाहित पत्नी या कुंआरी कन्या क जेका बस पभू सम्बन्धी विसयन क ही चिन्ता रहत ह। जेहसे उ अपने सरीर अउर आपन आतिमा स पवित्तर होइ सकइ। मुला एक विवाहित स्त्री संसारिक विसय भोगन में एह तरह लिप्त रहत ह कि उ अपने पति क रिझावत रहि सकइ। 35 मई तोहसे तोहरे भले क बरे ही कहत हउँ तोह पर बन्धन लगावे क बरे नाहीं। बल्कि अच्छी व्यवस्था क हित में अउर इही बरे कि तू चित्त क चंचलता क बिना पभू क समर्पित होइ सका।

36 अगर केउ सोचत ह कि उ आपन जवान होइ चुकी कुंआरी बिटिया क बरे उचित नाहीं करत बा अउर अगर ओकर काम भावना तेज बा, अउर दुन्नऊ क ही आगे बढ़िके बियाह कइ लेइ क जरूरत बा, तउ जइसन उ चाहत ह, ओका आगे बढ़िके वइसेन ही कइ लेइ चाही उ पाप नाहीं करत बा। ओका बियाह कइ लेइ चाही। 37 मुला जउन अपने मने में बहुत पक्का अहइ अउर जेह पर कउनउ दबावउ नाहीं बा, बल्कि जेकर इच्छन पर पूरा बस बा अउर जे अपने मने में पूरा निहचय कइ ललिहे बा कि अपने प्रिया स बियाह न करइ तउ उ अच्छा ही करत बा। 38 तउ उ जउन आपन प्रिया स बियाह नाहीं करत उ अउर भी अच्छा करत ह।

39 जब तलक किहउ स्त्री क पति जिन्दा रहत ह, तबउ तलक उ बियाह क बन्धन में बंधी होत ह मुला अगर ओकरे पति क मउत होइ जात ह, तउ जेकरे साथे चाहइ बियाह करइ, उ स्वतन्त्र बा मुला केवल पभू में। 40 पर अगर जइसेन उ बा वइसेन ही रहत ह, त जियादा खुस रही। इ मोर विचार अहइ। अउर मई सोचत अहउँ कि मोहूँ में परमेस्सर क आतिमा क ही निवास अहइ।

**चढ़ावइ क भोजन**

8 जब मूर्तियन पर चढ़ाइ गइ बलि क बारे में: हम इ जानित ह, “हम सबहिं गियानी अही।” “गियान” लोगन क अहंकार स भरि देत ह। मुला पिरेम स मनई अधिक सक्तिशाली बनत ह। 2 अगर केउँ सोचइ कि उ कछू जानत ह तउ जेका जानइ चाही ओकरे बारे में तउ ऊ अबहूँ कछू जनबइ नाहीं करत। 3 अगर केउ परमेस्सर क पिरेम करत ह त उ परमेस्सर क जरिये जाना जात ह।

4 तउन मूर्तियन पर चढ़ावा गवा भोजन क बारे में हम जानत अही कि एह संसारे में मूर्ति का अस्तित्व नाहीं बा। अउर इ कि “परमेस्सर केवल एक्कइ अहइ।” 5 अउर धरती या आकास में जद्यपि अइसेन ही देवता बहुत स अहई (बहुत स “देवता” हयेन, बहत स “पभू” हयेन।) 6 मुला हमरे बरे तउ एक्कइ परमेस्सर बा, हमार पिता। उही स सब कछू आवत ही अहइ। अउर ऊही क बरे हम जिअत अही। पभू केवल एक अहइ, ईसू मसीह। उही क द्वारा सब चीजन क अस्तित्व बा अउर ऊही क जरिये हमार जीवन बा।

7 मुला इ गियान सब कीहीउ क लगे नाहीं अहइ। कछू लोग जउन अब तलक मूर्ति पूजा क आदी अहई, अइसेन चीजन खात हीं अउर सोचत हीं जइसेन माना उ चीज मूर्ति क प्रसाद अहइ। ओनके इ करमे स ओनकर आतिमा कमजोर होइ क कारण दूषित होइ जात ह। 8 मुला उ प्रसाद तउ हमका परमेस्सर क लगे न लइ जाइ। अगर हम ओका नाहीं खाइ तउ कछू घटी नाहीं जात अउर अगर खाई तउ कछू बढ़ नाहीं जात।

9 सावधान रहा। कहूँ तोहर इ अधिकार ओकरे बरे, जउन कमजोर बाटेन, पाप में गिरइ क कारण न बन जाइ। 10 काहेकि कमजोर बिसवास क कउनउ मनई अगर तोहे जइसेन इ बिसय क जानकार क मूर्तिवाला मंदिर में खात भआ देखत ह तउ ओकर दुर्बल मन का ओह हद तलक न भटकि जाई कि उ मूर्ति पर बलि चढ़ाइ गइ चीजन क खाइ लागेन। 11 तोहरे गियान स, कमजोर मने क मनई क तउ नास ही होइ जाइ तोहरे उहीं बन्धु क, जेकरे बरे मसीह तउ जान दइ दिहेस। 12 इही तरह अपने भाइयन अउर बहिनियन क विरुद्ध पाप करत भए अउर ओनके कमजोर मने क चोट पहुँचावत भए तू लोग मसीह क विरुद्ध पाप करत अहा। 13 एह बरे अगर भोजन मोरे भाई क पाप क राह पर बढ़ावत ह तउ मई फिन कभउँ मौस न खाबइ ताकि मई अपने भाई क बरे, पाप करइ क कारण न बनउँ।

### पौलुस भी दुसरे प्रेरितन जइसा अहइ

9 का मई स्वतन्त्र नाहीं हउँ? का मई भी एक प्रेरित नाहीं हउँ? का मई हमार पभू ईसू मसीह क दर्सन नाहीं किहे अहउँ? का तू लोग पभू में मोर इ करम क उदाहरण नाहीं अहा! 2 चाहे दुसरेन क बरे मई प्रेरित न भी होउँ तबउ मई तोहरे बरे त प्रेरित हउँ। काहेकि तू एक अइसेन मोहर क समान अहा जउन पभू में मोरे प्रेरित होइ क प्रमाणित करत ह।

3 उ लोग जउन मोर जाँच करइ चाहत हीं, ओनके बरे आपन आत्मरच्छा में मोर उत्तर इ अहइ: 4 का हमका खाइ पियइ क अधिकार नाहीं बाटइ? 5 का हमका इ अधिकार नाहीं कि कउनो बिसवासिनी पत्नी क हम अपने साथे लइ जाइ? जइसेन क दूसर प्रेरित, पभू क बन्धु अउर पतरस किहे रहेन। 6 अउर का बरनाबास अउर मोरे लगे ही इ अधिकार बा कि आपन आजीविका कमाइ क बरे हम कउनउ काम न करीं? 7 सेना में अइसेन के होइ जउन एक सिपाही क रूपे में अपने क वेतन देइ। अउर के होइ जउन अंगूर क बगिया लगाइके ओकर फल न चखी? या कउन अइसा अहइ जउन भेड़न क खरका क देखभाल न करत होइ पर ओकर दूध न पीअत होइ?

8 का हम मानवीय चिन्तन क रूपे में ही अइसेन करत हई? आखिरकार का व्यवस्था क विधान भी अइसेन नाहीं कहत? 9 मूसा क व्यवस्था में लिखा बा, “खरिहाने में बरधा क मुँह जिन बाँधा।” \* का परमेस्सर केवल बरधन क बारे में बतावत अहइ? 10 (निश्चित रूप स उ एका क हमारे बरे नाहीं बतावत अहइ? हाँ, इ) हमारे बरे ही लिखा गवा रहा। काहेकि खेत जोतइवाला कीहीउ आसा स ही खेत जोतइ अउर खरिहाने में भूसा स अनाज अलगावइवाला फसल क कछू भाग पावइ क आसा तउ रखी। 11 फिन अगर हम तोहरे हिते क बरे आत्मिक बिया बोए अही तउ हम तोहसे भौतिक चीजन क फसल काटइ चाहित ह, इ का कउनउ बहुत बड़ी बात बा? 12 अगर दूसर लोग तोहसे भौतिक चीजन पावइ क अधिकार रखत हीं तउ हमार तउ तोह पइ का अउर भी जियादा अधिकार नाहीं बा? मुला हम इ अधिकार क उपयोग नाहीं किहे अही। बल्कि हम तउ सब कछू सहत रहे ताकि हम मसीह क सुसमाचार क रस्ता में कउनउ बाधा न डाली देइ। 13 का तू नाहीं जानत बाटया कि जउन लोग मंदिर में काम करत हीं उ पचे आपन खाना मंदिर स ही पावत हीं। अउर जउन नियमित रूप स वेदी क सेवा करत हीं वेदी क चढ़ावा में ओनकर हिस्सा होत ह? 14 इही तरह पभू व्यवस्था दिहे अहइ कि सुसमाचार क प्रचारकन क आजीविका सुसमाचार क प्रचार स ही होइ चाही।

15 मुला ओन्हन अधिकारन में स मई एक क कभउँ प्रयोग नाहीं किहेउँ। अउर इ बात मई एँह बरे लिखेउँ नाहीं कि अइसेन कछू मोरे बिसय में कीन्हा जाई। बजाय एकरे कि कउनउ मोसे ओह बात केउ छीन लेइ जेकर मोका गरब बा। ऐसे तउ मई मरि जाब ही ठीक समझब। 16 एह

बरे अगर मई सुसमाचार क प्रचार करित ह तउ एहमों मोका गरब करइके कउनउ हेतु नाहीं बा काहेकि मोर त इ कर्तव्य बा। अउर अगर मई सुसमाचार क प्रचार न करउँ तउ मोरे बरे इ केतना खराब होइ। 17 फिन अगर इ मई अपने इच्छा स करित ह तउ मई एकर पुरस्कार पावइ योग्य हई, परन्तु अगर आपन इच्छा स नाहीं बल्कि कउनो नियुक्ति क कारण इ काम मोका सौपा गवा ह। 18 तउ फिन मोर पुरस्कार काहे क? इही बरे जब मई सुसमाचार क प्रचार करित हउँ बिना कउनउ मूल लिहे ही ओका करउँ। ताकि सुसमाचार क प्रचार में जउन कछू पावइ क मोर अधिकार बा, मई ओकर कुल उपयोग न करउँ।

19 जद्यपि मई किहू मनई क बन्धन में नाहीं हउँ, फन मई खुद क तोहरे सबन क गुलाम बनाइ लिहे हउँ। ताकि मई अधिकतर लोगन क जीत सकउँ। 20 यहूदियन क बरे मई एक यहूदी जइसेन बनउँ, ताकि मई यहूदियन क उद्धार में मदद करि सकउँ मई खुद व्यवस्था क अधीन नाहीं अहउँ। जउन लोग व्यवस्था क अधीन अहई, ओनके बरे मई एक अइसेन मनई बरे जउन व्यवस्था क अधीन जइसेन बनेउँ। इ मई एह बरे किहे कि मई व्यवस्था क अधीनन क उद्धार करवइ में मदद कइ सकउँ। 21 मई एक अइसेन मनई बने जउन व्यवस्था क नाहीं मानत। जद्यपि मई परमेस्सर क व्यवस्था स रहित नाहीं हउँ बल्कि मसीह क व्यवस्था क अधीन हउँ। तउ कि मई जउन व्यवस्था क नाहीं मानत हउँ ओन्हे जीत सकउँ। 22 जउन मनइयन कमजोर अहई, ओनके बरे मई कमजोर बनेउँ ताकि मई कमजोरन क उद्धार करावइ में मदद कइ सकी। हर किहू क बरे मई हर किहू जइसेन बनेउँ त कि हर सम्भव उपाय स ओनकर उद्धार कइ सकउँ। 23 इ सब कछू मई सुसमाचार क बरे करत हउँ ताकि एकरे बरदानन में मोर भी कछू भाग होइ।

24 का तू लोग इ नाहीं जानत अहा कि खेल क मैदान में दौड़त सबहिँ धावक बाटेन मुला इनाम कउनो एक क मिलत ह। अइसेन दउड़ा कि जीत तोहार होइ सकइ। 25 कउनो खेल प्रतियोगिता में हर एक प्रतियोगी क हर तरह क आतिमा संयम करब होत ह। उ एक नासमान कीर्तिमान स सम्मानित होइ क बरे करत हीं मुला हम तउ एक अविनासी मुकुट क पावइ बरे इ करित ह। 26 एह तरह मई ओह मनई क समान दौड़त हउँ जेकरे सामने एक लच्छ बा। मई अहइ मुक्रेबाज क तरह मुक्का मारत मारत हउँ मुला मई हवा में मुक्का नाहीं मारत हउँ। 27 बल्कि मई तउ आपन सरीर क कठोर अनुसासन में तपाइके, ओका अपने बस में करत हउँ। ताकि कहुँ अइसेन न होइ जाइ कि दुसरेन क उपदेस देइ क बाद परमेस्सर क जरिये मई इ बेकार ठहराइ दीन्ह जाउँ।

### यहूदियन जइसेन न बना

10 भाइयो तथा बहिनियो, मई चाहित हउँ कि तू जान ल्या हमरे पूर्वजन क का भवा रहा जउन मूसा क व्यवस्था क मानत रहेन। अउर उ सबहिँ बादल क छत्र छाया में सुरच्छापूर्वक लाल सागर पार कइ ग रहेन। 2 ओन्हन सब क बादल क नीचे अउर समुद्र में मूसा क

अनुयायी क रूप में बपतिस्मा दीन्ह गवा रहा। 3ओन सभन क समान आत्मिक भोजन खाए रहेन। 4अउर उ सबइ समान आत्मिक पेय पिए रहेन काहेकि उ अपने साथे चलत रही उ आत्मिक चट्टान स ही जल ग्रहण करत रहेन। अउर उ चट्टान रही मसीह। 5मुला ओहमें स अधिकांस लोगन स परमेस्सर खुस नहीं रहा, इही बरे उ पचे मरुभूमि में मरि गएन।

6इ बातन अइसेन घटिन कि हमरे बरे उदाहरण सिद्ध होइ गइल। एहसे हम खराब बातन क कामना न करी जइसेन ओन्हन किहे रहेन। 7मूर्ति पूजक न बना, जइसेन कि ओहमों स कछू रहेन। पवित्र सास्तरन कहत ह: “मनई खाइ पिअइ क बरे बइठा अउर परस्पर आनन्द मनावइ क बरे उठा।” \* 8तउन आवा हम कभउं व्यभिचार न करी जइसेन ओनमें स कछू किहे रहेन। इही नाते ओहमें स 2,300 मनई एककइ दिन मरि गएन। 9आवा हम मसीह क परिच्छा न लेइ, जइसेन कि ओहमे स कछू जने लिहे रहेन। परिणाम उ लोग सौंप द्वारा मारा गएन। 10सिकवा सिकायत न करा जइसेन कि ओनमें स कछू करत रहत रहेन अउर इही कारण विनास क सरगादूत क जरिये मार डावा गएन।

11इ बात ओनके साथे अइसेन घटी कि उदाहरण बन जाइ। अउर ओन्हे लिख दीन्हा गवा कि हमरे बरे जेह पर युगे क अंत उतरा भवा बा, चेतावनी रहइ। 12एह बरे जउन इ सोचत ह कि उ मजबूती स खड़ा अहइ, ओन्हे सावधान रहइ चाही कि उ गिर न पड़इ। 13तू पचे कउनो अइसेन परिच्छा में नहीं पड़ा अहा जउन, मनइयन क बरे सामान्य नहीं बा। परमेस्सर बिसवासनीय अहइ। उ तोहार सक्ति स ज्यादा तोहे परिच्छा में न पड़इ देई। परिच्छा क साथे-साथे ओसे बचइ क रस्ता भी तोहे सबन क देइ ताकि तू परिच्छा क उत्तीर्ण कइ सका।

14हमर पिआरा दोस्तन, अंत में मई कहत हउं मूर्ति पूजा स दूर रहा। 15तोहे समझदार समझिके मई अइसेन कहत हउं। जउन मई कहत हउं, ओका अपने आप परखा। 16धन्यवाद क उ पियाला जेकरे बरे हम धन्यवाद देत हई, उ का मसीह क लहू (मृत्यु) में हमार साझेदारी नहीं बा? उ रोटी जेका हम तोड़त त हई, का ईसू देह में महमार साझेदारी नहीं बा? 17रोटी क होब एक अइसा तथ्य अहइ, जेकर अर्थ बा कि हम सब एककइ सरि स अही। काहेकि ओही रोटी में ही हम सब का साझेदारी बाटइ।

18ओन्हन इस्त्राएलियन (यहूदियन) क बारे में सोचा, जउन बलि क चीज खात हीं। का ओनकर ओह वेदी में साझेदारी नहीं अहइ? 19इ बात क मोरे कहइ क प्रयोजन का बा? का मई इ कहई चाहित ह कि मूर्तियन पर चढ़ावा गवा भोजन कछू महत्व क बाटइ? या कि मूर्ति कछू भी नहीं बाटइ। 20बल्कि मई इ कहत हउं कि अधर्मी जउन बलि चढ़ावत हीं, उ पचे परमेस्सर क बरे नहीं बल्कि दुस्त आतिमन क बरे चढ़ावत हीं। मई नहीं चाहत हउं कि तू पचे दुस्त आतिमन क बरे चढ़ावा। मई नहीं चाहित कि तू दुस्त आतिमन क साझेदार बना। 21तू पभू क कटोरा अउर

सइतान क कटोरा में स एक साथ नहीं पी सकत्या। तू सबइ पभू क भोज क चौकी अउर दुस्त आतिमन क खाना क चौकी, दुइनउं में एक साथे हींसा नहीं बटाइ सकत्या। 22का हम पभू क चिढ़ावइ चाहित ह? का जेतना सक्तिसाली उ अहइ, हम ओसे जियादा सक्तिसाली हई?

### आपन स्वतन्त्रता क प्रयोग परमेस्सर क महिमा क बरे करा

23जइसेन की कहा गवा बा कि, “हम कछू भी करइ क बरे स्वतन्त्र हई।” पर सब कछू हितकारी तउ नहीं अहई। “हम कछू भी करइ क बरे स्वतन्त्र हई।” मुला हर कउनो बात स बिसवास मजबूत तउ नहीं होत। 24केउ क भी मात्र सुवारथ क ही चिन्ता न करइ चाही बल्कि अउरन क भलाई क बारे में सोचइ चाही:

25बजार में जउन कछू बिकाइ, अपने अन्तरमने क अनुसार उ सब कछू खा। ओकरे बारे कउनउ प्रस्न न करा। 26काहेकि सास्तर कहत ह, “इ धरती अउर एह पर जउन कछू बा, सब पभू क अहइ।” \*

27अगर अबिसवासियन में स कउनउ मनई तोहे खाना पर बोलावइ अउर तू उहाँ जाइ चाहत अहा तउ तोहरे सामने जउनउ परोसा गवा बा, आपने अन्तमने क अनुसार सब खा। कउनउ प्रस्न न पूछा। 28मुला अगर केउ तोहे लोगन क इ बतावइ, “इ देवता पर चढ़ावा गवा चढ़ावा अहइ” तउ जे तोहे इ बतावइ, ओकरे कारण अउर अपने अन्तमने क कारण ओका न खा। 29मई जब अन्तमन कहत हउं तउ हमार मतलब तोहरे अन्तमने स नहीं बल्कि ओह दुसरे मनई क अन्तमने स बा। एकमात्र इहई कारण अहइ। काहेकि मोर स्वतन्त्रता भला दूसरे मनई क अन्तमने क जरिये लीन्ह गए निर्णय स सीमित काहे रहइ? 30अगर मई धन्यवाद दइके, खाना में हिस्सा लेइत ह तउ जेह चीज क बरे मई परमेस्सर क धन्यवाद देइत ह, ओकरे बरे मोर आलोचना नहीं कीन्ह जाइ चाही।

31इही बरे चाहे तउ खा, चाहे पिआ, चाहे कछू अउर करा, सब कछू परमेस्सर क महिमा क बरे करा। 32यहूदियन क बरे रहा या गैर यहूदियन क बरे जउन परमेस्सर क कलीसिया क अहई, ओनके बरे कभउं बाधा न बना 33जइसे मई खुद सब तरह स हर कउनो क खुस रखइ क जतन करत अहउं, अउर बिना इ सोचे कि मोर सुवारथ का अहइ, परमार्थ क सोचत हउं ताकि ओनकर उद्धार होइ।

**11** तऊन तू लोग वइसेन ही मोर अनुसरण करा जइसेन मई मसीह का अनुसरण करित हउं।

### अधीन रहा

2मई तोहार प्रसंसा करत हउं। काहेकि तू मोका हर समइ सुमिरत करत रहत ह; अउर जउन सिच्छन मई तोहे दिहे हउं, ओनका सावधानी स पालन करत रह्या। 3पर मई चाहित ह कि तू इ जान ल्या कि स्त्री क सासक पुरुस

अहइ, पुरुस क सासक मसीह अहइ, अउर मसीह क सासक परमेस्सर अहइ। 4हम अइसे मनई जउन सिर ढाँकिके पराथना करत ह या परमेस्सर कइँती बोलत ह, उ आपन प्रधान क अपमान करत ह। 5पर हर एक अइसी स्त्री जउन बिना सिर ढाँकिके पराथना करत ह या जनता में परमेस्सर कइँती बोलत ह, उ अपने प्रधान क अपमानित करत ह। उ ठीक ओह स्त्री क समान अहइ जे आपन सिर मुंडवाइ दिहे अहइ। 6अगर कउनउ स्त्री आपन सिर नहीं ढाँकत तउ उ अपने बालउ काहे नहीं मुँडवाइ लेत। मुला अगर स्त्री क बरे बाल मुँडवाउब लज्जा क बात अहइ तउ ओका आपन मूँड ढकैइ चाही। 7मुला पुरुस क बरे आपन मूँड ढकब अच्छा नहीं बा काहेकि उ परमेस्सर क सरूप अउर महिमा क प्रतिबिम्ब अहइ। मुला एक स्त्री आपन पुरुस क महिमा क प्रतिबिम्ब कहत ह। 8हम अइसेन एह बरे कहत हई काहेकि पुरुस कउनो स्त्री स नहीं, बल्कि स्त्री पुरुस स बनी बाटइ। 9पुरुस स्त्री क बरे नहीं रचा गवा बल्कि स्त्री क रचना पुरुस क बरे कीन्ह गइ बा। 10इही बरे परमेस्सर तउ ओका जउन अधिकार दिहे अहइ, ओकर प्रतीक रूप स स्त्री क चाही कि उ आपन मूँड ढाकइ। ओका सरगादूत क कारण अइसेन करइ चाही। 11फिन भी उ पभूँ में न तउ स्त्री पुरुस स स्वतन्त्र अहई अउर न तउ पुरुस स्त्री स। 12काहेकि जइसेन पुरुस स स्त्री आइ, वइसेन ही स्त्री पुरुस क जनम दिहेस। मुला सब केउँ परमेस्सर स आवत हीं।

13खुद निर्णय करा। का एक स्त्री क मूँड उघारे परमेस्सर क पराथना करब अच्छा लागत ह? 14का खुद प्रतीक तोहे नहीं देखौवत कि अगर केउ पुरुस आपन बाल लम्बा बढइ देइ तउ इ ओकरे बरे सरम क बात अहइ, 15अउर इ कि एक स्त्री क बरे इहइ ओकर सोभा अहइ? सहीयउ में ओका ओकरे लम्बा बाल एक प्राकृतिक ओढ़नी क रूप में दीन्ह गवा बा। 16अब एँह पर अगर कउनउ बिबाद करइ चाइ तउ हमका कहइ क होइ कि न तउ हमरे इहाँ कउनउ अइसेन प्रथा परमेस्सर क कलीसिया में नहीं बा।

### पभूँ क भोज

17अब इ आदेस देत हउँ मईँ तोहार प्रसंसा नहीं करत हउँ काहेकि तोहार आपस में मिलब तोहार भला करइ क बजाय तोहे हानि पहुँचावत बा। 18सबसे पहिले इ कि मईँ सुने हउँ कि तू लोग सभा में जब परस्पर मिलत हया त तोहरे बीच मतभेद रहत ह। कछू अंस तक मईँ एह पर बिसवास करत हउँ। 19(आखिरकार तोहरे बीच मतभेद भी होइहीं। जेहसे कि तोहरे बीच में जउन अच्छा ठहरावा गवा बा, उ सामने आइ जाइ।) 20तउन जब तू आपस में इकट्ठा होत ह तउ सचमुच पभूँ क भोज पावइ क बरे नहीं एकट्ठा होत्या, 21मुला जब तू भोज ग्रहण करत ह त तोहमों स हर केउँ आगे बढ़ि क अपनेन ही खाना पर टूट पड़त ह। अउर बस केउ मनई तउ भूखइ ही चला जात ह, जब कि कउनउ मनई बहुत जियादा खाइ-पी क मस्त होइ जात ह। 22का तोहरे लगे खाइ-पीअइ क बरे आपन घर नहीं बा। अउर एह तरह तू परमेस्सर क कलीसिया क अनादर नहीं करत अहा? अउर जउन दीन अहईँ ओनकर

तिरस्कार करइ क चेस्टा नहीं करतेन? मईँ तोहसे का कहीं? एकरे बरे का मईँ तोहर प्रसंसा करउँ। एह बिसय में तोहार प्रसंसा न करब।

23काहेकि जउन सीख मईँ तोहे सबन क दिहे हउँ, उ हमका पभूँ स मिली रही। पभूँ ईसू त ओह रात, जब ओका मरवाइ डालइ क बरे पकड़वावा ग रहा, एक ठु रोटी लिहेस, 24अउर धन्यवाद देइ क बाद, उ ओका तोड़ेस अउर कहेस, “इ मोर देह अहइ, जउन तोहरे बरे बा। मोका याद करइ क बरे तू अइसेन ही किहा करा।” 25उ भोजन कइ चुकइ क बाद इही तरह उ कटोरा उठाएस अउर कहेस, “इ कटोरा मोरे लहू क जरिये कीन्ह गवा एक नवा करार अहइ। जब कभउँ तू एका पिआय तबहिँ मोका याद करइ क बरे अइसेन करा।” 26काहेकि जेतनी बार उ तू एँह रोटी क खात ह अउर एह कटोरा क पिअत ह, ओतनी बार जब तलक उ आइ नहीं जात, तू पभूँ क मउत क प्रचार करत रहा।

27अतः जब केउ पभूँ क रोटी या पभूँ क कटोरा क अनुचित रूप स खात-पिअत ह, उ पभूँ क देह अउर ओकर लहू क बरे अपराधी होइ। 28मनई क चाहे कि उ पहिले अपने क परखइ अउर तब इ रोटी क खाई अउर इ कटोरा क पिअइ। 29काहेकि पभूँ क देह क मतलब समझे बिना जउन एह रोटी क खात ह अउर एह कटोरा क पिअत ह, उ एह तरह खाइ-पीके अपने उप्पर सजा क बोलावत ह। 30इही बरे तउ तोहमों स बहुत लोग कमजोर अहईँ बीमार अहईँ अउर बहुत स त चिरनिद्रा में सोइ ग अहईँ। 31मुला अगर हम अपने आप क अच्छे तरह स परख लिहे होइत हमका पभूँ क सजा न भोगइ पड़ी। 32पभूँ हमका अनुसासित करइ क बरे सजा देत थ। ताकि हमका संसार क साथे दण्डित न कीन्ह जाइ।

33एह बरे कि हे मोर भाइयो तथा बहिनियो, जब भोजन करइ त एकट्ठा होत ह तउ परस्पर एक दूसरे क इन्तजार करा। 34अगर सहीयउ में कउनो क बहुत भूख लगी होइ तउ ओका घरे पर खाइ लेइ चाही ताकि तोहार एकत्र होइ तोहरे बरे दण्ड क कारण न बनइ। अउर, दूसर बातन क जब मईँ अउबइ तबइ सुलझाउब।

### पवित्र आतिमा क बरदान

12 भाइयो तथा बहिनियो, अब मईँ चाहत हउँ कि तू आतिमा क बरदान क बारे में जाना। 2तू जानत अहा कि जब तू विधर्मी रह्या तब तोहे गँगी जइ मूर्तियन कइँती जइसेन भटकावा जात रहा, तू वइसेन ही भटकत रह्य। 3तउन मईँ तोहे बतावत हउँ कि परमेस्सर क आतिमा क बोलइ वाला कउनउ इ नहीं कहत, “ईसू क स्नाप लगइ” अउर पवित्र आतिमा क बगैर मदद द्वारा कहइवालन क न केउ इ कहि सकई, “ईसू पभूँ अहइ।”

4हर एक क आतिमा क अलग-अलग बरदान मिला बा। मुला ओनका देइवाली आतिमा तउ एककइ बा। 5सेवा कइउ तरह क निश्चित कीन्ह गइ बाटिन मुला हम सब जेकर सेवा करत अही उ पभूँ तउ एक ही अहइ। 6काम-काज बहुत स बतावा गवा बाटिन मुला सबहिँ क

बीच सब कामन क करइवाला उ परमेस्सर तउ एक ही अहइ। 7सब कउनो में आतिमा केउ न केउ रूपे में परगट होत ह जउन हर एक क भलाइ क बरे होत ह। 8कउनो क आतिमा क जरिये परमेस्सर क गियान स युक्त भइ बोलइ क योग्यता दीन्ह गइ बा। तउ केउ क उही आतिमा क जरिये दिव्य गियान क प्रबचन क योग्यता। 9अउर केउ क उही आतिमा द्वारा बिसवास क बरदान दीहा गवा बा तउ केउ क चंगा करइ क छमता ऊही आतिमा क जरिये दीन्ह गइ बा। 10अउर केउ दूसरे मनई क अद्भुत कारजन करइ क सक्ती दीन्ह गइ बा तउ केउ दूसरे क परमेस्सर कईंती स बोलइ क सामर्थ्य दीन्ह गवा बा। अउर केउ क मिली बा भली बुरी आतिमा क अन्तर क पहिचानइ क सक्ती कउनो क अलग-अलग भाखा बोलइ क सक्ती मिली भइ बा: तउ केउ क भाखा क बियाखिया कईके ओकर मतलब निकालइ क सक्ती। 11मुला इ उहई एक आतिमा बा जउन जेह-जेह क जइसेन-जइसेन ठीक समझत ह, देत भए इन सब बातन क पूरा कइ सकत ह।

### मसीह क देह

12जइसेन हममें स हर एक क सरीर तउ एकइ बा, पर ओहमाँ अंग कइयउ बाटेन। अउर यद्यपि अंगन क कइयउ रहत भए ओनसे देह एकइ बनत ह वइसेन ही मसीह अहइ। 13काहेकि चाहे हम यहूदी रहा अही, चाहे गैर यहूदी, सेवक होइ य स्वतन्त्र। एकइ सरीर क विभिन्न अंग बनी जाइ क बरे हम सब क एकइ आतिमा द्वारा बपतिस्मा दीन्ह गवा अउर पियास बुझावइ क हम सब क एकइ आतिमा दीन्ह गइ बा।

14अब देखा, मनई सरीर कउनो एक अंग स ही तउ बना नाहीं होत, बल्कि ओहमाँ बहुत स अंग होत हीं। 15अगर गोड़ कहई, “काहेकि मई हाथ नाहीं हउँ, इही बरे मोर सरीर स कउनउ सम्बन्ध नाहीं तउ इही बरे क उ सरीर क अंग न रही। 16इही तरह अगर कान कहइ, “काहेकि मई आँख नाहीं हउँ,” एह बरे मई सरीर क नाहीं हउँ।” तउ का इही कारण स उ सरीर क अंग न रही। 17अगर एक आँख ही सब सरीर होत तउ सुना कहाँ स जात? अगर कान ही सब सरीर होत तउ सूँधा कहाँ स जात? 18मुला परमेस्सर जइसा ठीक समझेस उ सही में सरीर में वइसेन ही स्थान दिहेस। 19तउ सरीर क सब अंग एक जइसा ही होइ जात तउ सरीर ही कहाँ होत। 20मुला स्थिति इ बा कि अंग त कइयउ होत हीं मुला सरीर एकइ रहत ह।

21आँख हाथे स इ नाहीं कहि सकत, “मोका तोहार जरूरत नाहीं बाटइ!” या अइसे ही सिर, गोड़न स इ नाहीं कहि सकत, “हमका तोहार जरूरत नाहीं!” 22एकरे बिलकूल उल्टा सरीर क अंगन क हम कमजोर समझित ह, उ सबइ बहुत जरूरी होत हीं। 23अउर सरीर क जउने अंगन क हम कम आदरणीय समझित ह, ओनकर हम जियादा धियान रखित ह। अउर हमार गुप्त अंग अउर जियादा सालीनता पाइ लेत हीं। 24जब कि हमरे प्रदर्शनीय अंगन क एह तरह क उपचार क जरूरत नाहीं होत। मुला परमेस्सर तउ हमरे सरीर क रचना एह ढंग स किहेस ह जेहसे ओन अंगन क

जउन कम सुन्दर बा अउर जियादा आदर मिलइ। 25ताकि देहे में कहुँ कउनउ फूट न पड़इ बल्कि देहे क अंग परस्पर एक दुसरे क समान रूप स धियान रखईं। 26अगर सरीर क कउनउ एक अंग दुख पावत ह तउ ओकरे साथे सरीर क अउर सभन अंग दुखी होत हीं। अगर कउनउ एक अंग क मान बढ़वत ह त ओकर खुसी में सभन अंग हिस्सा बटाव थीं।

27एह तरह तू सभन लोग मसीह क देह अहा अउर अलग-अलग रूप में ओकर अंग अहा। 28एँतना ही नाहीं परमेस्सर तउ कलीसिया में पहिले प्रेरितन क, दूसरे नबियन क, तीसरे उपदेसकन क फिन अद्भुत कारजन करइ वालन क, चंगा करइ क सक्ती स युक्त मनइयन क, फिन ओनकर जउन दुसरन क सहायता करत हीं, स्थापित किहे अहइ, फिन अगुवाई करइवालन क अउर फिन ओन्हन लोगन क जउन विभिन्न भाखा बोल सकत हीं। 29का इ सब लोग प्रेरित अहई? का इ सब लोग नबी अहई? का इ सब लोग उपदेसक अहई? का इ सब लोग अवरज काम करत हीं? 30का इ सब लोगन क लगे चंगा करइ क सक्ती बाटइ? का इ सब लोग दूसर भाखा बोलत हीं? 31हाँ, मुला आतिमा क अउर बड़ा बरदान पावइ क बरे यत्न करत रहा। अउर इ सबन क बरे अच्छा रस्ता तू पचन क अब मई देखउब।

### पिरेम महान बा

**13** अगर मई मनइयन अउर सरगदूत क भाखा बोल सकउँ मुला मोहेमाँ पिरेम न होइ, तउ मई एक बाजत भआ सिरिफ घड़ियाल या झंकारत भइ झाँझ अहउँ। 2अगर मई परमेस्सर कईंती स बोलइ क सक्ती क बरदान प्राप्त करउँ अउर जदि मई परमेस्सर क सबइ रहस्यन क जानत होउँ अउर समूचा दिव्य गियान मोरे लगे होइ अउर एँतना बिसवास उ मोका होइ कि पर्वतन क अपने स्थान स सरकाइ सकउँ, मुला मोहेमाँ पिरेम न होइ तउ मई कछू नाहीं अहउँ। 3अगर मई आपन सारी सम्पत्ति थोड़-थोड़ कइके जरूरत मन्द क बरे दान कइ देउँ अउर अब चाहे अपने सरीर तक क जलाइ डालइ क बरे सौंप देउँ मुला अगर मई पिरेम नाहीं करित तउ।

4एहसे मोर भला होइवाला नाहीं बा। पिरेम धीरजपूर्ण बा, पिरेम दयामय बा, पिरेम में ईर्सा नाहीं होत, पिरेम आपन प्रसंसा आप नाहीं करत। 5उ अभिमानी नाहीं होत। उ अनुचित व्यवहार कबहुँ नाहीं करत, उ सुवार्थी नाहीं बा, पिरेम कबहुँ झुँझलात नाहीं, उ बुराइयन क कउनउ लेखा-जोखा नाहीं रखत। 6बुराइ पर कबहुँ ओका खुस नाहीं होतइ। उ तउ दुसरन क साथे सत्य पर आनंदित होत ह। 7उ हमेसा रच्छा करत ह, उ हमेसा बिसवास करत ह। पिरेम हमेसा आसा स भरा रहत ह। उ सहनशील बा।

8पिरेम अमर बा। जब कि भविस्सबाणी करइ क सामर्थ्य तउ समाप्त होइ जाइ, दूसर भाखा क बोलइ क छमता स जुरी भइ जीभ एक दिन चुप होइ जइहीं, दिव्य गियान क उपहार जात रही, 9काहेकि हमार गियान तउ अधूरा बा।

हमार सब भविस्सबाणी अपूर्ण बाटिन। 10मुला जब पूर्णता आई तउ उ अधूरापन चला जाई।

11जब मई गदेलो रहे तउ एक गदेलो क तरह ही बोला करत रहे, वइसेन ही सोचत रहे अउर उही तरह सोच विचार करत रहे, मुला अब जब मई बाढ़िके मनई बनि गवा हउँ, तउ उ बचपने क बात जात रही बाटइ। 12काहेकि अबहिं तउ दरपन मँ हमका एक धुँधली सी छाया देखौय पड़त रही बा मुला पूरी तरह मिलि जाए पइ हम पूरी तरह आमने-सामने देखब। अबहिं तउ मोर गियान तनिक बा मुला समइ आवइ पर उ पूरा होये। वइसे ही जइसे परमेस्सर मोका पूरी तरह जानत ह। 13इही बीच बिसवास, आसा अउर पिरेम तउ बना ही रहई अउर इन तीनऊ मँ सबसे महान बाटइ पिरेम।

### आत्मिक बरदान क कलीसिया क सेवा मँ लगावा

**14** पिरेम क रस्ता पर कोसिस करत रहा। अउर आध्यात्मिक बरदान क निष्ठा क साथे अभिलास करआ। बिसेस रूप स परमेस्सर क तरफ स बोलइ क।

2काहेकि जेका दुसरन क भाखा मँ बोलइ क बरदान मिला ब, उ तउ सही मँ लोगन स नाही, बल्कि परमेस्सर स बात करत बाटइ। काहेकि ओका केउ समझ नाही पावत, उ त आतिमा क सक्ति स रहस्यमय होइके बानी बोलत बा। 3मुला उ जेका परमेस्सर कइँती स बोलइ क बरदान मिला बा, उ लोगन स ओन्हे आतिमा मँ मजबूत प्रोत्साहन अउर चैन पहुँचावइ बरे बोलत बा। 4जेका विभिन्न भाखन मँ बोलइ क बरदान मिला बा उ तउ बस आपन आतिमा क ही मजबूत करत ह मुला जेका परमेस्सर कइँती स बोलइ क सामर्थ्य मिला बा उ समूची कलीसिया क आध्यात्मिक रूप स मजबूत बनावत ह।

5अब मई चाहत हउँ कि तू सबइ दूसर कइयउ भाखा बोल। मुला एहसे जियादा मई इ चाहित हउँ कि तू परमेस्सर कइँती स बोल सका काहेकि कलीसिया क आध्यात्मिक मजबूती क बरे अपने कहे क बियाखिया करइवाले क छोड़िके, दूसरी भाखा बोलइवालन स परमेस्सर कइँती स बोलइवाला बड़ा बा।

6तउन भाइयो तथा बहिनियो, अगर दूसरी भाखन मँ बोलत भआ मई तोहरे लगे आवउँ तउ एहसे तोहार का भला होइ, जब तलक कि तोहरे बरे मई कउनउ रहस्य उद्घाटन, दिव्य गियान, परमेस्सर क सन्देश या कउनउ उपदेस न देउँ। 7इ बोलब त अइसेन ही होइ जइसे कउनो बाँसुरी या सांरगी जइसेन निर्जीव बाजा क आवाज। अगर कउनो बाजा क स्वरन मँ परस्पर साफ अन्तर न होइ तउ कउनउ कइसे पता लगाइ पाई कि बाँसुरी या सांरगी पर कउन स धुन बजाइ जात बा। 8अउर अगर बिगुल स अस्पस्ट आवाज निकलइ लागइ तउ फिन युद्ध क बरे तइयार के होई? 9इही तरह कउनो दूसरे क भाखा मँ जब तक कि तू साफ-साफ न बोला, तब तलक केऊँ कइसेन समझ पाई कि तू का कहे रहया। काहेकि अइसेन मँ तू बस हवा मँ बोलाइवाला ही रही जाब्या। 10एहमँ कउनउ संदेह नाही बा कि संसार मँ भाँति-भाँति क बोली अहई अउर ओहमँ स कउनउ खराब नाही अहइ। 11तउन अब तलक

मई ओह भाखा क जानकार नाही हउँ, तब तलक बोलइवालन क बरे मई एक अजनबी ही रहबइ। अउर उ बोलइवाला मोरे बरे एक ठु अजनबी ही ठहरी। 12तोह पइ इ बात लागू होत ह काहेकि तू आध्यात्मिक बरदानन क पावइ बरे उत्सुक अहा। इही बरे ओहमँ भरपूर होइ क प्रयास करा। जेहसे कलीसिया क आध्यात्मिक मजबूति मिली जाइ।

13परिणामस्वरूप जउन दूसर भाखा मँ बोलत ह, ओका पराथना करई चाही कि उ आपन कहे क मतलब भी बताइ सकइ। 14काहेकि अगर मई किहींउ अउर भाखा मँ पराथना करउँ तउ मोर आतिमा त पराथना करत रही होत ह मुला मोरे बुद्धि बेकार रहत ह। 15तउ फिन का करइ चाही? मई आपन आतिमा स तउ पराथना करबइ। मुला ओकरे साथ आपन बुद्धि स भी पराथना करबइ। आपन आतिमा स त ओकर स्तुति करबइ ही मुला आपन बुद्धि स भी ओकर स्तुति करबइ। 16काहेकि अगर तू केवल आपन आतिमा स ही कउनउ आसीबाद द्या तउ हुवाँ बइठा कउनउ मनई जउन बस सुनत अहइ, तोहरे धन्यवाद पर “आमीन” कइसे कहि देई काहेकि तू जउन कहत अहा, ओका उ जनबइ नाही करत। 17अब देखा तू तउ चाहे भली-भाँति धन्यवाद देत अहा मुला दूसर मनई क तउ ओसे कउनउ आध्यात्मिक मजबूति नाही होत।

18मई परमेस्सर क धन्यवाद देत हउँ कि मई तोसे बढ़कर क विभिन्न भाखा बोलि सकित हउँ। 19मुला कलीसिया सभा क बीच कउनो दूसरी भाखा मँ दसहु हजार सब्द बोलइ क अपेच्छा आपन बुद्धि क उपयोग करत हुए पाँच सब्द बोलब अच्छा समझत अहउँ ताकि दूसरे क भी उपदेस दइ सकउँ।

20भाइयो तथा बहिनियो, अपने बिचारन मँ गदेलन क नाई रहा बल्कि बुराइयन क बारे मँ अबोध गदेलो जइसेन बना रहा। मुला आपन चिन्तन मँ समझदार बना। 21व्यवस्था मँ लिखा बा:

“उपयोग ओनकर करत भए अउर बोली बोलत जउन, ओनके ही मुँहन क, उपयोग करत भए जउन क पराया मई करबइ बात एनसे पर न इ हमार सुनिहीं बात तब भी।”

यसायाह 28:11-12

पभूँ अइसेन ही कहत ह।

22तउन दूसर भाखा बोलइ क बरदान अबिसवासियन क बरे संकेत अहइ न कि बिसवासियन क बरे अहइ। जब कि भविसबाणी करब अबिसवासियन बरे नाही बल्कि बिसवासियन बरे अहइ। 23तउन अगर समूचा कलीसिया एकट्ठ होइ अउर हर केऊँ दूसर-दूसर भाखा मँ बोलत होइ तब भी बाहर क लोग या अबिसबासी भितर आइ जाई तउ का उ पचे तोहे पागल न कइहीं। 24मुला अगर हर केउ परमेस्सर कइँती स बोलत होई अउर तब तलक कछू अबिसबासी या बाहर क आइ जाई त का सब लोग ओका ओकर पाप क बोध न कराइ देईहीं। सब लोग जे कहत हीं, ऊही पइ ओकर निआव होई। 25जब ओकरे मने क भितर छिपा भेद

खुली जाइ तब तलक उ इ कहत भआ, “सचमुच तोहरे बीच परमेस्सर अहइ।” दण्डवत प्रणाम कइके परमेस्सर क आराधना करिहीं।

### तोहार सभा अउर कलीसिया

26भाइयो तथा बहिनियो! तउ फिन का करइ चाही? तू जब एकट्ठा होत ह तोहमाँ स कउनउ भजन, कउनउ उपदेस अउर कउनउ आध्यात्मिक रहस्य क उद्घाटन करत ह। कउनउ केउ अउर भाखा में बोलत ह त कउनउ ओकर बियाखिया करत ह। इ सब बात कलीसिया क आध्यात्मिक मजबूती क बरे कीन्ह जाइ चाही। 27अगर केउ अउर भाखा में बोलत बाटइ तउन जियादा स जियादा दुइ या तीन क ही बोलइ चाही अउर बारी बारी, एक-एक कइके अउर जउन कछू कहा गवा बा, एक-एक क ओकर बियाखिया करइ चाही। 28अगर उहाँ बियाखिया करइवाला केउ न होइ तउ बोलइवाले क चाही कि उ सभा में चुपइ रहइ अउर फिन ओका अपने आप स अउर परमेस्सर स ही बात करइ चाही।

29परमेस्सर कइँती स ओकर दूत क रूप में बोलइ क जेनका बरदान मिला बा, अइसेन दुइ या तीन नबियन क ही बोलइ चाही अउर दूसरन क चाही कि जउन कछू उ कहे अहइ, उ ओका परखत रहइँ। 30अगर हुवाँ केउ बइठा भआ पर कउने क बात रहस्य उद्घाटन होत ह जउन परमेस्सर कइँती स बोलत अहइ पहिला वक्ता क चुप होइ जाइ चाही। 31काहेकि तू एक-एक कइके भविस्सबाणी कइ सकत ह्या ताकि सबहिँ लोग सीखईँ अउर प्रोत्साहित होईँ। 32नबियन क आतिमन नबियन क बस में रहत हीं। 33काहेकि परमेस्सर अव्यवस्था नाहीं देत, उ सान्ति देत ह। जइसेन कि सन्तन क सभन कलीसियन में होत ह। 34स्त्रियन क चाही क उ कलीसियन में चुप रहईँ काहेकि ओन्हे सान्त रहइ चाही, बल्कि जइसेन कि व्यवस्था में कहा गवा बा, ओनका दबिके रहइ चाही। 35अगर उ कछू जानइ चाहत ह तउ ओन्हे घरे पे आपन-आपन पति स पूछइ चाही काहेकि एक स्त्री क बरे सर्मानाक अहइ कि उ सभा में बोलइ।

36का परमेस्सर क बचन तोहसे पैदा भवा बा? या उ मात्र तोहे तलक पहुँचा? निश्चित नाहीं बा। 37अगर केउ सोचत ह कि उ नबी अहइ अउर ओका कछू आध्यात्मिक बरदान मिला बा तउ ओका पहिचान लेइ चाही कि मईँ तोहे जउन कछू लिखत हउँ, उ पभूँ क आदेस बा। 38तउन अगर केउ ऐँका नाहीं पहिचान पावत तउ ओका उ परमेस्सर द्वारा भी नाहीं जाना चाई।

39एह बरे मोर भाइयो तथा बहिनियो, परमेस्सर कइँती स बोलइ क तत्पर रहा अउर दूसरा भाखा में बोलइ वालन क भी न रोका। 40मुला इ सभन बातन सही ढंग स अउर व्यवस्थानुसार कइ जाइ चाही।

### ईसू क सुसमाचार

15 भाइयो तथा बहिनियो, अब मईँ तोहे सबन क ओह सुसमाचार क याद दिवावइ चाहत हउँ जेका मईँ तोहे

सुनाए हउँ अउर तूहउ सबे जेका ग्रहण किहे रहया अउर जेहमाँ तू हमेसा स्थित बना भवा अहा। 2अउर जेकरे जरिये तोहर उद्धार भी होत बा बसतेँ तू ओन्हन सब्दन क जेका मईँ तोहे आदेस दिहे रहेउँ, अपने में मजबूती स थामे रखा। (नाहीं तउ तोहर बिसवास धारन करबइ ही बेकार गवा।)

3जउन सबसे पहिले बात मोका मिली भइ रही, ओका मईँ तोहे तलक पहुँचाइ दिहेउँ कि पवित्तर सास्तरन क अनुसार, मसीह हमरे पापन क बरे मरा 4अउर ओका दफनाइ दीन्ह गवा। अउर पवित्तर सास्तरन क अनुसार फिन तीसरे दिना ओका जियाइके उठाइ दीन्ह गवा। 5अउर फिन उ परतस क सामने परगट भवा अउर ओकरे बाद बारह प्रेरितन क उ दर्सन दिहे।

6फिन उ पाँच सऊ स भी जियादा भाइयन क एक साथे देखौँ दिहेस। ओनमाँ स बहुतेरे आज तकल जिन्दा अहईँ। जद्यपि कछू क मउत भी होइ चुकी बा। 7एकरे बाद उ याकूब क सामने परगट भवा। अउर तब उ सभी प्रेरितन क फिन दर्सन दिहेस। 8अउर सब स अंत में ओ मोका भी केउ दर्सन दिहेस। मईँ तउ समइ स पहिले असामान्य जन्मा सतमासा बच्चा जइसेन अहउँ।

9काहेकि मईँ तउ प्रेरितन में सबसे छोटका हउँ। इहाँ तलक कि मईँ तउ प्रेरित कहवावइ क योग्य नाहीं हउँ, काहेकि मईँ तउ परमेस्सर क कलीसिया क सतावा करत रहेउँ। 10मुला परमेस्सर क अनुग्रह स मईँ वइसेन बना हउँ जइसेन आज अहउँ मोहे पइ ओनकर अनुग्रह बेकार नाहीं गवा। मईँ त ओन सबसे बड़ी चढ़ी क मेहनत किहे हउँ, जद्यपि उ मेहनत करइवाला मईँ नाहीं रहेउँ, बल्कि परमेस्सर क उ अनुग्रह रहा जउन मोरे साथे रहत रहा। 11तउन चाहे तोहे मईँ उपदेस दिहे होइ चाहे ओ, मईँ सब इहईँ उपदेस देइत ह अउर इही पइ तू बिसवास किहे अहा।

### हमार पुनरुत्थान

12मुला जब कि मसीह क मरे भएन में स पुनरुत्थान कीन्ह गवा तउ तोहमाँ स कछू अइसेन काहे कहत बाटेन कि मउत क बाद फिन स जी उठब सम्भव नाहीं बा। 13अउर अगर मउत क बाद जी उठब ही नाहीं तउ फिन मसीह क मउत बाद नाहीं जियावा गवा। 14जदि मसीह नाहीं जिया तउ हमार उपदेस देब बेकार बा अउर तोहार बिसवास भी बेकार बा। 15अउर हमहूँ फिन तउ परमेस्सर क बारे में झूठ साच्छी ठहरत अही काहेकि हम तउ परमेस्सर क सामने कसम खाइके इ साच्छी दिहे अही कि उ मसीह क मरे भएन में स जियाएस। मुला उनके कहइ क अनुसार अगर मरा भवा जियावा नाहीं जात तउ फिन परमेस्सर मसीह क भी नाहीं जियाएस। 16काहेकि अगर मरा भवा नाहीं जियाइ जात ह तउ मसीह क भी नाहीं जियावा गवा। 17अउर अगर मसीह क फिन स जिन्दा नाहीं कीन्ह गवा रहा, फिन तउ तोहार बिसवास भी बेकार बा, अउर तू अबहुँ अपने पापन में फँसा भवा ह। 18हाँ, तउ फिन जे मसीह क बरे आपन प्रान दइ दिहेन, उ सबइ अइसेन ही खतम भएन। 19अगर हम केवल अपने भौतिक जीवन क बरे ही ईसू

मसीह में आपन आसा रखे रही तब तउ हम अउर सबहि लोगन स जियादा अभागा हई।

20मुला अब सहीमें इ अहइ कि मसीह क मरे भएन स जियावा गवा। उ मरे भएन क फसल क पहिला फल अहइ। 21काहेकि जब एक ही मनई क द्वारा मउत आइ तक एक मनई क द्वारा ही मउत स फिन जिन्दा होइ उठा। 22काहेकि ठीक वइसेन ही जइसेन आदम क कर्मन क कारण हर किहू क बरे मउत आइ, वइसेन ही मसीह क द्वारा सबक फिन स जियाइ उठावा जाई। 23मुला हर एक क ओकरे अपने कर्म क अनुसार सबसे पहिले मसीह क, जउन फसल क पहिला फल अहइ अउर फिन ओकरे पुनः आवई पर ओनकर, जउन मसीह क अहेन। 24एकरे बाद जब मसीह सबन सासकन, अधिकरियन, हर तरह क सक्तियन क अंत कइके राज्य क परमपिता परमेस्सर क हाथन सौंपे देई, तब प्रलय होइ जाई। 25मुला जब तलक परमेस्सर मसीह क सत्रुवन क ओकरे परमेस्सर नियन्त्रण में न लाइ देइ तब तलक उ अवस्य राज्य करी। 26सबसे आखिरी सत्रु क रूपे में मउत क नास कीन्ह जाई। 27पवित्र सास्तर कहत ह, “परमेस्सर तउ हर केउ क मसीह क चरनन क अधीन रखे बा।”\* अब देखा जब सास्तर कहत ह, “सब कछू” क ओकरे अधीन कइ दीन्ह गवा बा, तउ जउन, सब कछू क ओकरे चरनन क अधीन कीन्हा बाटेन, उ खुदइ एकर अपवाद बा। 28अउर जब सब कछू मसीह क अधीन कइ दीन्ह गवा बा, तउ इहाँ तलक कि खुद बेटवा केऊ ओह परमेस्सर क अधीन कइ दीन्हा जाई, जे सब कछू क मसीह क अधीन कइ दिहेस ताकि हर केउ पइ पूरी तरह परमेस्सर क सासन होइ।

29नाहीं तउ जे अपने परान क दिहे अहई, ओनकइ कारण जउन बपतिस्मा लिहे अहई, उ पचे का करिहीं। अगर मरा हुआ कभउँ फिन स जिन्दा होतेन नाहीं तउ लोगन क ओनकर बरे बपतिस्मा दीन्ह ही काहे जात अहइ?

30अउर हमई सब घड़ी संकट झेलत रहित ह? 31भाइयो, तोहरे बरे मोर उ गरब जेहमाँ हमार पर्भू मसीह ईसू में स्थित होइ क नाते रखत हई, ओका साछी कइके कसम खाइके कहत हई कि मई हर दिन मरित हउँ। 32अगर मई इफिसुस में जंगली पसुवन क साथे मानवीय स्तर पर ही लड़े रहे तउ ओसे मोका का मिला। अगर मरा भवा स जिआवा नाहीं जानेत तउ, “आवा, खाई, पीई काहेकि काल्हि तउ मरिन जाब।”\*

33भटकब बन्द करा: “खराब संगत स अच्छी आदत खतम होइ जात हीं।” 34होस में आवा, अच्छा जीवन अपनावा, जइसेन कि तोहे होइ चाही। पाप करब बन्द करा। काहेकि तोहमाँ स कछू तउ अइसेन अहई जउन परमेस्सर क बारे में कछू भी नाहीं जानतेन। मई इ एह बरे कहत हउँ कि तोहे सरम आवइ।

\*“परमेस्सर ... बा” भजन: 8:6

\*“आवा ... जाब” यसा: 22:13; 56:12

### हमका कइसेन देह मिली?

35मुला केउ पूछ सकत ह, “मरा भवा कइसे जिआवा जात ह? अउर उ फिन कइसेन देह धारन कइके आवत ह?” 36तू केतना मूर्ख अहा। तू जउन बोअत अहा उ जब तलक पहिले मरि नाहीं जांत जिन्दा नाहीं होत। 37अउर जहाँ तलक जउन तू बोवत अहा, ओकर प्रस्न बा, तउ जउन पऊधा बिकसित होइ क बा, तू ओह भरा-पूरा पऊधा क तउ धरती में नाहीं बोउत्या। बस केवल बीया बोवत अहा, चाहे उ गोहूँ क दाना होइ अउर चाहे कछू अउर क। 38फिन परमेस्सर जइसेन चाहत ह, वइसेन रूप ओका देत ह। हर बीज क उ ओकर आपन सरीर प्रदान करत ह। 39सबहि जिन्दा मनइयन क सरीर एक जइसा नाहीं होत। मनइयन क सरीर एक तरह क होत ह जबकि पसुवन क सरीर दूसरे तरह क। चिड़ियन क देह अलग तरह क होत ह अउर मछलियन क अलग। 40कछू देह दिव्य होत ह अउर कुछ पार्थिव मुला दिव्य देह क आभा एक तरह क होत ह अउर पार्थिव सरीर क दुसरे प्रकार क। 41सूरज क तेज एक तरह क होत ह अउर चाँद क दुसरे तरह क। तारन में भी एक भिन्न तरह प्रकास रहत ह। अउर हाँ, तारन क प्रकास भी एक दुसरे स भिन्न रहत ह।

42तउन जब मरे भए जी उठिहीं तबऊ अइसेन ही होई। उ देह जेका धरती में दफनाइ क “बोवा” गवा बा, नासवान बा मुला उ देह जेकर पुनरुत्थान भवा बा, अबिसवासी बाटइ। 43उ काया जउन धरती में “दफनाई” गइ बा अनादरपूर्ण बा मुला उ काया जेकर पुनरुत्थान भवा बा, महिमा स मंडित बा। उ काया जेका धरती में “दफनाई” गवा बा, कमजोर बा मुला उ काया जेका फिन स जिन्दा कीन्ह गवा बा, सक्तिशाली बा। 44जेह काया क धरती में “दफनावा” गवा बा, उ प्राकृतिक बा मुला जेका फिन स जिन्दा कीन्ह गवा बा, उ आध्यात्मिक देह अहइ।

अगर प्राकृतिक सरीर होत हीं, तउ आध्यात्मिक सरीरन क भी अस्तित्व बा। 45पवित्र सास्तरन कहत ह: “पहिला मनई (आदम) एक सजीव प्राणी बना।”\* मुला अंतिम आदम (ईसू) जीवन दाता आतिमा बना। 46आध्यात्मिक पहिले नाहीं अउतेन, बल्कि पहिले आवत हीं भौतिक अउर फिन ओकरे बाद ही आवत हीं आध्यात्मिक। 47पहिले मनई क धरती क माँटी स बनावा गवा अउर दूसर मनई सरगे स आवा। 48जइसेन ओह मनई क रचना माँटी स भइ, वइसेन ही सबन लोग माँटी स ही बेनन। अउर ओह, दिव्य मनई क समान अउर दिव्य मनइयन भी स्वर्गीय बाटेन। 49हम उ माटी स बने मनई क तरह बनाए गयेन ह, तउ ओह स्वर्गीय क रूप भी हम धारन करब। 50भाइयो तथा बहिनियो, मई तोहे इ बतावत हउँ: लहू अउर माँस क इ पार्थिव सरीर परमेस्सर क राज्य क उत्तराधिकार नाहीं पाइ सकतेन। अउर न ही जउन बिनासमान अहई, उ अविनासी क उत्तराधिकारी होइ सकत हीं। 51सुना, मई तोहे सबन क एक रहस्यपूर्ण सत्य बतावत हउँ: हम सबन मरबइ न, बल्कि हम सब बदल दिहा जाबइ। 52जब अंतिम तुरही बजी तब

\*“पहिला ... बना” उत्पत्ति 2:7

पलक झपकत एक छन में ही अइसेन होइ जाई। काहेकि तुरही बजे अउर मरा हुआ अमर होइके जी उठिहीं अउर हम जउन अबहिं जिन्दा हयेन, बदलि दिहा जइहीं। 53काहेकि इ नासवान देह क अविनासी चोला क धारन करब जरूरी बा अउर एह मरनसील काया क अमर चोला धारन कइ लेब जरूरी बा। 54तउन जब इ नासवान देह अविनासी चोला धारण कइ लेई अउर उ मरणसील काया अमर चोला ग्रहण कइ लेई तउ पवित्र सास्तर क लिखा इ पूरा होइ जाई।

“विजय त मऊत क निगल लिहा।”

यसायाह 25:8

55“अरी ओ मऊत! तोहार बिजय अब कहाँ बा? अरी ओ मऊत! तोहार दंस कहाँ बा?”

होसे: 13:14

56पाप मऊत क दंस अहइ अउर पाप क सकती मिलत ह व्यवस्था स। 57मुला परमेस्सर क धन्यबाद बा जउन पभू ईसू मसीह क जरिये हमका बिजय देवावत ह।

58तउन मोर पिआरा भाइयो तथा बहिनियो, अटल बना डटा रहा। पभू क काम क बरे अपने आपके हमेसा पूरा तरह अर्पित कइ द्या। काहेकि तू त जनतइ अहा कि पभू में कीन्ह गवा तोहार काम बेकार नाहीं बा।

### दूसरे बिसवासियन क बरे भेंट

16 अब देखा! संतन क बरे दान एकट्ठा करइ क बारे में मई गलातियन क कलीसियन क जउन आदेस दिहे हउं तुहउं वइसेन ही करा। 2हर रविवार क आपन आय में स कछू न कछू अपने घरे पर ही एकट्ठा करत रहा। ताकि जब मई आउं ओह समइ दान एकट्ठा न करइ पड़इ। 3मोरे ऊहाँ पहुँचइ पर जेह कउनो मनई क तू चाहा, मई ओका परिचय पत्र दइके तोहर उपहार यरुसलेम लइ जाइके बरे भेज देबइ। 4अउर अगर मोर जाबऊ अच्छा भवा तउ उ पचे मोरे साथेन चला जइहीं।

### पौलस क सबइ योजना

5मई जब मैसीडोनिया होइके जाबइ तउ तोहरे लगे भी अउबइ काहेकि मैसीडोनिया स होत भवा जाइके कामे क मई निश्चित कइ चुका हउं। 6होइ सकत ह मई कछू समइ तोहरे साथे ठहराउं या जाड़ा ही तोहरे साथे बितावउं ताकि जहाँ कहूँ मोका जाइ क होइ, तू मोका बिदा कइ सका। 7मई इ तउ नाहीं चाहित कि उहाँ स जात-जात ही बस तोहसे मिल लेउं बल्कि मोका तउ आसा बा कि मई अगर पभू चाही तउ कछू समइ तोहरे साथे रहबइ। 8मई पिन्तेकुस्त

क उत्सव तक इफिसुस स ठहरबउं। 9काहेकि ठोस काम करइ क सम्भावना क भी उहाँ बड़ा दुवार खुला बा अउर फिन उहाँ मोर विरोधी भी त बहुत स अहईं।

10अगर तीमुथियुस आइ पहुँचइ त धियान रख्या ओका तोहरे साथे कस्ट न होइ काहेकि मोरे समान ही उहउ पभू क काम करत बा। 11इही बरे कउनउ ओका छोट न समझइ। ओका ओकरे इ यात्रा पर सान्ति क साथे बिदा कर्या ताकि उ मोरे लगे आइ पहुँचइ। मई दूसरे भाइयन क साथे ओकरी अवाई इ इन्तजार करत हउं।

12अब हमार भाइ अपुल्लोस क बात इ बा कि मई ओका दुसरे भाइयन क साथे तोहरे लगे जाइ क बहुत जियादा उत्साहित किहे अहईं। मुला परमेस्सर क इ इच्छा बिल्कुल नाहीं रही कि उ अबहिं तोहरे लगे आवत। मुला अवसर पउतइ ही उ आइ जाई।

### पौलस क पत्र क समाप्ति

13सावधान रहा। मजबूती क साथे आपन बिसवास में अटल बना रहा। 14साहसी बना, सक्तिशाली बना। तू जउन कछू करा, पिरम स करा।

15तू लोग स्तिफनास क घरान क तउ जनबइ करत ह कि उ अखाया क फसल क पहिला फल अहइ। उ परमेस्सर क लोगन क सेवा क बीड़ा उठाए अहइ। तउन भाइयो तथा बहिनियो, तोहसे मोर निवेदन बा कि। 16तू लोग भी अपने आप क अइसेन लोगन क अउर हर ओह मनई क अगुवाई में सौंप द्या जउन एह काम स जुड़ा बा अउर पभू क बरे मेहनत करत ह।

17स्तिफनास, फुरतूनातुस अउर अखइकुस क उपस्थिति स मई खुस हउं। काहेकि मोरे बरे जउन तू नाहीं कइ सक्या, अउर उ पचे कइ देखाएन। 18उ पचे मोर अउर तोहार आतिमा क आनन्दित किहे अहईं। इही बरे अइसेन लोगन क सम्मान करा।

19एसिया प्रान्त क कलीसियन कइँती स तोहे पभू में नमस्कार! अक्विला अउर प्रिस्किल्ला! ओनके घरे पर एकट्ठा होइवाली कलीसिया कइँती स तोहे हार्दिक नमस्कार। 20सबन भाइयो तथा बहिनियो, कइँती स तोहे सबन क नमस्कार। पवित्र चुम्मा क साथे तू आपस में एक दुसरे क सत्कार करा।

21मई पौलस, तोहे सबन क अपने हाथन स नमस्कार लिखत हउं। 22अगर केउ पभू में पिरम नहीं रखतेन तउ ओनका अभिसाप मिलइ। हमार पभू अवा! 23पभू ईसू क अनुग्रह तोहे सबन क मिलइ। 24ईसू मसीह में तोहरे बरे मोर पिरम तू सबन क साथे रहई।